


西湖志

ル 5  
1100  
10

拾





1110  
10

1100  
10



西湖志卷之二十一

名賢

明

楊孟瑛 萬曆杭州府志孟瑛字温甫四川酆都縣人成化丁未進士弘治十六年知杭州遷順天府丞去以在任浚西湖多糜官帑被劾復降知府事實錄載孟瑛守杭議開西湖盤查御史胡文璧劾其開濬無功費用官帑至二萬三千餘兩宜罷黜吏部議以工在既往理無可復宜仍將孟瑛降除



杭州量用民力以終前功故有是命孟瑛當事敢任多便民美政其浚復西湖俾水有蓄洩實利益下塘諸田亦一時敏幹吏云西湖遊覽志孟瑛知杭州府時西湖民間規占者十九孟瑛建議於御

史車梁僉事高江銳意濬復

詳見水利

惠隆 分省人物考隆字從道號北屏仁和人弘治癸丑進士授刑部主事進員外郎擢江西按察司副使所至以治績顯甫踰強仕即解組歸營別墅於所居東許茅亭花榭極幽雅之趣垂老足不履

公門口不談世務與吳樂閒輩為五老歸田會登眺湖山以觴詠自娛倣唐香山宋洛社之遺矩繪圖梓詩以傳嘉靖仁和縣志隆罷政家居宅臨下湖構西爽樓遠對西山層巒疊嶂仰之悉入目中吳瓚 分省人物考瓚字器之號樂閒仁和人弘治庚戌進士授弋陽縣陞南通州知州甫兩月乞休力辭軒冕性好吟咏多撰述考求遺聞作武林紀事八卷足備湖山掌故

吳一貫 萬曆杭州府志一貫字道夫廣東海陽縣



人成化辛丑進士弘治十年按浙精敏強毅敢於有爲酌科差務節省以紓民困著爲條式俾垂永久民咸賴之歷大理少卿以剛直忤逆瑾謫嵩明知州瑾誅復江西按察副使進按察使卒季旻西湖復古堰記樂天通石函子瞻築石堰所以鍾其源而節其流也後人壞堰而易之以版守者得以爲奸漲溢乃靳而不啟旱則啟而竭之或因而取貨焉爲湖之病數十年矣弘治丁巳監察御史吳君巡按浙江以興利除害爲已任欲復其舊鳩工

琢石不日告成濱湖上下之人得享舊日之利

王守仁 名山藏守仁字伯安餘姚人弘治十二年進士授刑部主事改兵部武選司正德元年科道官以論劉瑾忤旨逮繫守仁論救謫龍場驛丞瑾誅擢廬陵知縣陞南京刑部主事調吏部郎陞南太僕鴻臚少卿右僉都御史巡撫南贛寧王宸濠反以便宜檄諸道兵攻之遇之湖擒之陞南京兵部尙書參贊機務封新建伯卒諡文成萬曆初從祀孔子廟西湖遊覽志守仁之旣擒宸濠也忽傳



王師已及徐淮遂乘夜遄發至錢塘凜凜憂慄作  
詩云靈鷲高林暑氣清竺天石壁雨痕晴客來湖  
上逢雲起僧住峰頭話月明世路久知難直道此  
身那得尚浮名移家早定孤山計種果誅茅卻易  
成頃之王師遣人追宸濠復還江西遂謝病居淨  
慈寺淨慈寺志守仁自鄉舉時讀書南屏後擒宸  
濠忽傳王師已及徐淮遂乘夜遄發至錢塘謝病  
居淨慈成詩六首南屏之陽有洞以公名嘗建天  
眞精舍於龍山之陽卽今勳賢祠也

顧璘列朝詩集傳璘字華玉吳縣人弘治丙辰進  
士累官南京刑部尙書晚歲家金陵文學藉甚居  
都會之地處承平之世享園林鐘鼓之樂江左風  
流迄今猶推領袖嘗傳華玉在浙物色孫太初不  
可得稍聞輒道衣幅巾放舟湖上冀行求得之月  
下有舟泊斷橋下一僧一鶴一童子煮茗笑曰此  
必太初也移舟就之遂往還無間

孫一元列朝詩集傳元字太初秦人嘗棲太白之  
顛故稱太白山人風儀秀朗元巾白裕以鐵笛鶴



瓢自隨所至傾動其士大夫嘗入吳會遂棲遲不去費宏罷相訪之南屏山中植其晝寢就卧內與語送之及門了不酬謝費出語人曰吾一生未嘗見此人也歐餘漫錄太初寓南屏山嘗畜一鶴自隨與許給諫台善許爲置田一二畝歲輸粟於萬峰深處以充鶴糧而作券予之初太初開籠調鶴鶴飛去台初用唐人想伊只在秋江上之句首尾作詩一律兩人風趣雖林君復亦當欣讓矣西湖遊覽志西湖之改名高士湖也孫太白自序云正

德乙亥孟春與石川子泛舟西湖石川子曰昔青蓮居士李白與尙書郎張謂泛沔川南湖因改爲郎官湖今日予與子游頗追蹟前事西湖固可爲高士湖矣大笑酌酒於湖命予詩紀之

李贊 兩湖塵談李方伯平軒在浙省時公暇輒爲山行遇適興處卽走筆題詠兩山佳處往往有之風致清高政事精敏惜齋志以沒

孫景時 分省人物考景時字成叔杭之右衛人性耿介於世寡諧師事陽明甘泉二先生正德丙子



西湖志 卷二十一 五  
舉於鄉筮仕長洲教諭遷攸縣令卻餽謝無何解  
官歸乃搜輯故典證以長老舊聞質諸鄉評作武  
林文獻錄修杭州府志

張文宿 分省人物考文宿字拱辰號白厓仁和人  
賦性奇偉風儀玉立早涉墳典旁及諸子履道植  
仁敦孝秉義蔚然動士林望正德癸酉薦於鄉嘉  
靖癸未釋褐授晉江令以風操孤勁自持未幾落  
職乃蕭然長往門堵空蕪不怨也就西湖傍築一  
小樓樓未及成有二鵲日啾啾從梁題間營巢巧

李通谷匠人以為異即名其樓曰來鵲湖中又置一  
舫大司馬白泉汪公署曰水月樓日與郡中沈青  
門田豫陽李岫樓方十洲童南衡張太華結為西  
湖書社或遇穠辰豔景登樓放舟賦詩詩成酒散  
互相砥礪辭華沈著不為浮綺為一時所宗云

方豪 西湖遊覽志方思道豪開化人正德間刑部  
郎中雅好山水居湖最久嘗築室於石屋號齊樹  
樓少師夏公謹贈以詩

龐尙鵬 舊浙江通志尙鵬廣東南海人嘉靖間巡



按浙江墨吏多解印綬去嘗令士民歎析利弊立  
一條鞭法仍臚舊名曰毋使後人重徵也西湖遊  
覽志嘉靖十八年巡按御史傅鳳翔行縣清理西  
湖占據御史龐尙鵬刻碑於清波湧金錢塘三門  
嚴爲禁防

童偉 萬曆杭州府志嘉靖時錢塘童封君偉既有  
章服猶雅淡如素嘗製巨竹爲桴放西湖中隨波  
流止命曰煙波釣筏

李元昭 列朝詩集傳元昭字用晦杭州人世襲千

戶棄去不就與童侍御南衡方職方十洲輩結社  
西湖其詩皆明農習隱之言又好鍊丹構廬於靈  
隱慎菴之址曰响嶼山房詞客過者多爲詩贈之  
錢可久 江南通志可久字思畏桐城人詩才俊逸  
字畫道潤自言與杭州西湖結物外交駕舟千里  
訪之扣舷高歌旁若無人一時推爲風雅之冠

徐夢華 留青日札夢華字子善錢塘人魁梧倜儻  
燕額虬髯其詩蕭豁雋朗有翫爾樓稿如西湖曲  
湖水年年綠春花度度新六橋歌舞地幾易管絃



人年二十六爲安南參軍有思親詩爲憐萱草庭前冷不戀梅花嶺上春卽挂冠歸其人品可知

田汝成 分省人物考汝成字叔禾杭州人嘉靖丙戌進士授南京刑部主事由員外郎轉禮部儀制忤時宰出爲廣東僉事轉廣西左參議及歸里盤桓湖山間探禹穴上四明窮雁蕩泛吳淞涉邗江遨遊河洛五六年卒著西湖遊覽志

周詩 列朝詩集傳詩字以言崑山人風致逸爽以詩文游公卿間游武林敝衣匿僧寺中提學孔天引自翰林出雅負知詩閱岳鄂王廟題壁詩曰何事疥吾壁也命隸人篲墨掃之至以言詩乃大驚立命駕往獨與定交武林人爭延致以言不懌辭歸皇甫子循題云周山人留別西湖一篇尤爲選體之冠婉麗以會景俊逸以宣情春容以達氣縱筆二百言無一字谿徑真得古人之髓

田藝衡 舊錢塘縣志藝衡字子藝汝成子教授應天博學善屬文自弱冠以詩賦著聲海內名公爭交驩焉所著前後正續集數十卷雜著數十種說



者謂其文采中涵奇輝外射裕清淑之粹參扶輿之靈浙江不足滌其瀾西湖不足澄其潔鳳山不足萃其昂吳越之遺墟南宋之廢址不足以悽其感騷逸而下罕見其儔譽之不無少過而多聞好奇世以比之成都楊慎爲人廣曠磊落不可羈馮至老愈豪朱衣白髮挾兩女奴坐西湖花柳下客至卽其座唱酬斗酒百篇人又擬之謫仙云

黃省曾 萬曆錢塘縣志省曾字勉之吳郡人博雅工文詞與錢塘田汝成交莫逆嘉靖中來游西湖

傲居南屏最久自號五嶽山人涉險不假筇策湖山之勝足跡幾遍談說形勝窮狀奧妙歌咏隨之所著有寓林集

吳玘 分省人物考玘字汝瑩號南岑錢塘縣人舉嘉靖癸未進士歷官廣東布政使參政性疎爽治園亭西湖之濱與賓客燕游其間若樂而忘檢者至持官特嚴奉親以孝

張瀚 分省人物考瀚字子文號元洲杭州人成進士初任部郎爲治行第一積官至吏部尙書持衡



數年務以進賢退不肖爲主一時吏治喁喁及歸  
嘯咏湖山間善書法兼工點染詩文莊麗典則有  
奚囊蠹餘松窗夢語藏於家卒諡恭懿

李奎

列朝詩集傳奎字伯文錢塘人由布政司吏

再考從事錦衣雅善詩從齊人謝榛游錦衣經歷  
沈鍊文章忠義士也兩人深相結納調護一時諫  
臣論劾執政下詔獄者人皆歸功陸炳而不知伯  
文與鍊陰爲之地也鍊具疏將劾嚴嵩父子舉酒  
屬伯文以後事伯文已許之已而下獄嵩父子力

構寘之死伯文傾身庇之得末減世蕃詞知之欲  
中以奇禍乃脫身歸里與方太守九敘沈山人仕  
結社湖山之間年八十餘卒葬西湖之上歸安茅  
坤伐石表之曰詩人李珠山之墓

祝時泰

舊錢塘縣志時泰字汝亨號九山閩縣人

博雅善詩嘉靖中鄉舉官員外郎挂冠歸慕錢塘  
湖山之勝卜居西湖與郡人高應冕童漢臣方九  
敘沈仕劉子伯結玉岑詩社遨游嘯咏以終其身

方九敘

西湖八社詩姓氏方九敘字禹績號十洲



錢塘人爲承天太守方九敘西湖八社詩序杭蓋  
東南大都會山水蔚盤昔人擬之清都洞天頃歲  
丙午予嘗與田豫陽氏八人結社湖曲賦詩紀游  
今所傳西湖社選是其作也近復偃息林泉追逐  
雲月茲社也凡會之地八同會之人六若予六人  
仕隱固殊風雅道合豈偶然歟樂天香山洛陽耆  
英古今社事茲其兼美矣

沈仕 仁和縣志仕字懋學侍郎銳少子弱冠有才  
名夢游青門山及寤求名山志讀之見秦時東陵

侯邵平隱此歎曰古隱者居也吾其隱乎遂棄舉  
子業自稱青門山人以詩歌自娛好古法書名畫  
日摩挲久之有得援筆揮灑風神氣韻絕勝顛門  
遇佳山水輒流連旬月嘉靖中客京師諸貴人聞  
其名爭造請待以上客贈遺累千金隨手散去年  
七十返故廬家徒四壁資繪畫以自給然意所不  
當者雖重資不爲動人獲片紙珍若拱璧卒於家

陳仕賢 萬歷杭州府志仕賢字邦宸福建福清人  
嘉靖壬辰進士歲己亥來知杭州奉職循理事簡



政平靈隱寺志仕賢擊楊璉真伽像於飛來峰

錢立

分省人物考立仁和人嘉靖乙丑進士授刑

部主事歷官廣西副使生平恬於仕進自郎署典郡意未嘗不在林壑既歸屏跡公府時與二三朋舊結社湖山晚歲兀坐一室焚香手一編顏所居曰怡老

沈梅

茅坤近溪沈公墓表嘉靖乙卯余罷官歸棲

聖水寺同通政馬公三才太僕卿沈公淮光州守

高君冕山人沈君仕輩爲西湖社遊是時近溪沈

公梅與馬沈爲同年友亦囊詩筒過焉公性怡曠與人交無城府坑塹三試南宮不第補博士諭銅陵未幾令貴池旣至省供億絕饋遺邑之豪舉而翫法者稍芟蕪之節冗費決滯獄平徭役刷庠序以循吏稱按節使檄而獎之者沓至然性澹而亢不善俯仰譽者什九而齟齬之者亦什之一於是解綬歸結廬茗上別卜築於北山中曰怡閒閉戶讀書嚮所共西湖社遊者並凋落殆盡猶數過聖水共余徜徉泉石間所草西湖志多先輩見聞所



不逮其他近溪集也足堂俚語茗上遊咏西湖遊  
詠諸手著士大夫數口賞不置卒年七十六家世  
安溪里故號近溪

茅瓚

錢塘縣志瓚字邦獻少時夢神人授二巨字

文曰見滄因以爲號讀書寶奎寺山顛始至夜分  
雷雨大作崖崩數十丈獨所居無恙質明露見滄  
二大字蓋故鑱宋理宗御書適與夢符戊戌殿試  
第一歷南北祭酒禮部侍郎兼學士加太子賓客  
以吏部右侍郎引疾歸

許岳

茅坤廣東按察使司副使少佳許公墓表公

舉進士由尙書郎出樞蕪湖則謹筦鑰監蘆洲則  
絕勳貴而按穎上也海夷內訌公且以身撼之以  
讒貶沔陽州同知徙判岳州擢荊州同知蜀寇黃  
中勢張甚公入施州度險隘審嚮導募死士料芻  
餉寇隨以殄中朝方議賞而節使以前任許姓者  
不法事悞移公公不復辨棄官歸尋擢常州守移  
柳州課農桑興學校飭吏胥息桴鼓彬彬然唐柳  
柳州風概峒蠻嘯山谷蒐治之斬獲無算移守梧



州以功晉廣東海道副使乞骸歸其馬通政沈太僕暨余輩往來西湖爲社吟督府銅梁張公顏其堂曰清風高節人以爲實錄云

林梓

杭州府志梓字汝林嘉靖壬戌進士歷延平

守有政蹟擢金騰副使歸結廬葛嶺日從吾別墅

邵穆生

黃汝亨高士邵虎菴塔銘穆生一名重生

別號虎菴比部員外郎經邦仲子生而骨相磊落吐音弘亮爲諸生不屑科舉比偶之學年三十卽

屏居靈鷲山之呼猿洞開鑿巖岫營構軒閣樹藝

花木所貯自經史外多古文奇字元筌秘笈之書

晨昏披覽凡四十餘年不入城市精皇極數多驗

所游名山卽自爲圖畫多古法間出王叔明米元

章筆意然不多作詩不模擬唐句往往自抉骨髓

絕慾跌坐不倒身側足夜如其晝一日忽倒身卧

胷突生一骨痛不可忍卽猛省跌坐如昨痛骨立

消於是命治龕戒毋用木踰月而葬冢上置塔塔

覆以亭歿前二日撤食飲水數斗遷居樓下危坐

靜存而逝所著有武林山七志山中甲子詩文數



種仁和縣志穆生字汝宣感父廷杖事棄舉子業  
隱靈鷲山中築閣祀許由及唐宋名賢爲樓三楹  
中祀其父右自處藏書又三楹足不入城市布政  
使吳用先欲見之謀於黃汝亨汝亨請屏騶從以  
儒生服往汝亨先行謂穆生曰有桐城學者欲見  
公讀所著書穆生許之吳入遂設飲極歡而罷明  
日汝亨札至曰昨來乃方伯吳公求所著書穆生  
亦不靳也善畫有求畫者輒不與曰吾豈畫師耶

陳善 杭州府志善字思敬父荆獻博學端方從王

文成先生游善幼穎異從父游文成門文成曰此  
任道器也弱冠舉進士三令巖邑擢郎官督學滇  
粵士悉悉向風仕至雲南左布政使未六十予告  
歸講明理學步中規矩危坐終日無疾言遽色尤  
好施濟待以舉火者甚衆收掩道殣修治東新餘  
杭諸塘慈雲黃泥諸嶺纂修杭州府志十年而成

徐桂 兩浙名賢錄桂字茂吳餘杭人博綜經史工  
古文詞登隆慶辛未進士授袁州府推官堅正不  
阿每執法失上官指遂投劾歸僦居杭城之東隅



地幽僻有亭池竹木之勝中列經史圖石與商彝  
周鼎法書名畫日婆娑其中有潔癖巾帳衣履無  
不精楚興至發爲詩歌尤長咏物西湖十咏膾炙  
人口屬和者數十家終不及也

姜召

舊錢塘縣志

召字可叔四川廣安州人萬曆

初由進士令錢塘性廉敏一目數行人一見終身  
不忘剖决若神旦坐堂皇至午罷衙庭空無人時  
獨棹小艇西湖上焚香讀書與諸文士譚論經義  
亶亶不倦在邑八年四境清肅百廢具舉後令朱

光祚請祠名宦焉

馮夢禎

錢謙益南國子祭酒馮公墓誌公諱夢禎

字開之其先高郵人徙嘉興之秀水少慧就塾師  
吟諷不輟王母惜膏火止之引被障窗疏帷燈至  
旦其專勤如此隆慶庚午舉於鄉萬曆丁丑會試  
第一選庶吉士與同年生以文章意氣相豪跌宕  
俯仰聲華籍甚亦以此負狂簡稱鄒忠介抗論江  
陵拜杖遠戍獨送之郊外執手慷慨除編修江陵  
沒執政精求史館中觚角嶄出能蘖牙異同者及



其未翼而翦之坐是終以不振嘗假歸師事盱江  
羅近溪講性命之學居喪蔬素專精竺墳參求生  
死大事紫柏可公以宗乘倡於東南奉杖樞衣稱  
幅巾弟子蕭閒澹漠無意榮進補廣德州判官量  
移行人司副尚寶司丞陞南京國子司業遷右諭  
德再遷右庶子拜國子監祭酒成均文體士氣翕  
然一變端居造士闕略酬對南曹郎疾其慢已飛  
章劾之遂移病去官築菴於孤山之麓名其堂曰  
快雪山雲團戶湖水浮階禪燈丈室清歌洞房海

內望之以爲仙真洞府凡九年而卒舊錢塘縣志  
夢禎晚年製桂舟貯書畫春花秋月遨遊西湖竟  
月不返亦時與僧蓮池及邵重生虞淳熙兄弟朱  
大復諸公結放生社是時徐桂茂吳餘杭人屠隆  
長卿四明人歲來入社吟咏甚富

莫叔明 舊錢塘縣志叔明字公遠長洲人一名更  
生字延年因游湖山樂焉自號冷泉子爲詩險奧  
卓絕務爲人所不經道忘情世味簞瓢晏如後徙  
居湖墅臨古樹清流卽其地坎焉命其子曰死卽



埋我於是王世貞為誌曰詩人莫公遠墓

何倫

錢塘縣志倫字士明性至孝方四歲得所分

鮭魚不食而藏之夕更薦父母稍長談古今忠孝大節輒撫几而泣父歿負土成墳哀感行路歲大祲與妻子採湖中菱芡雜菽以進其母不知為祲歲家有甘井闢汲道以與鄉里其邑人有訐家事者倫歎曰是不可長也作正俗八議眾避之著家規心訓二書督學蘇濬序而梓之曰何孝子集

聶心湯

錢塘縣志心湯字純中新淦人萬歷甲辰

進士令錢塘沉粹明敏事至即決適南湖水溢於是建化灣塘次築閘次議濬湖次建捍江塘士民思其德剏石頌之聶心湯錢塘縣志自敘不佞蒞錢塘五年覽勝湖山緬懷昔賢濬水溉田致芡菱穀米水泉之用世世功德於民詢之掌故則缺焉而未詳於是取郡志西湖志而損益之有徵可信因例起義釐為十紀以備遺忘

黃汝亨

仁和縣志汝亨字貞父萬曆二十六年進

士授進賢知縣邑多浮賦上書臺司力爭寬徵遷



南京工部主事陞禮部郎尋遷江西提學僉事進  
布政參議備兵湖西踰年以祝釐便道還浙遂謝  
病不復出結廬南屏小蓬萊題曰寓林以著作自  
娛持縑素碑板造請者相望於道每避客六橋之  
陰輕舟軟輿蹤跡既至則啟窗一笑酒茗交行揮  
翰如飛有寓林文集二十卷詩六卷行世

葛寅亮

靈隱寺志寅亮字肥瞻曆官司農嘗督學  
楚閩稱得人閒居教授弟子數千性儉素布衣徒  
步於靈竺之間不知其爲貴人也舊錢塘縣志寅

亮字水鑑號肥瞻北定鄉人也舉萬曆浙江鄉試  
第一辛丑成進士授南禮部主事轉郎中引疾還  
杜門不交公府就湖南築精舍讀書談道其中負  
笈者多四方名士質疑問難必披析與盡凡口傳  
筆記靡不宗葛氏學焉位至少司農卒年七十七  
肥瞻談經講藝汲引人才惟日不足所著有湖南  
講行世易繫詞講治安策仕學錄造適集苑爾集  
藏於家

虞淳熙

黃汝亨稽勳德園虞公墓誌司勳虞公長



孺舉省試第四人成進士時萬曆癸未也授兵部  
職方司主事遷主客員外郎踰月改司勳又踰月  
引疾歸公愛惜名勝兩峰六橋三潭間松石花鳥  
蟲魚之屬咸加愛護公故貧儒子力不能購書獲  
有奇秘與弟閉門抄寫晝夜不盡不止以故涵育  
浸灌汪洋奧衍有武庫行秘書之目詩文宏深微  
妙應念而作風生雨集排古盪今作者人人自廢  
去官歸隱南山回峰下採藥行樂嘯咏惟適臺府  
大吏及四方之客游武林者懷刺造廬欲一識其

面悉戒閤以絕天下知與不知語及虞司勳輒曰  
異人云

陸振奇

舊錢塘縣志振奇字若冲斯如里人工文

章與里中鄭之惠馮夢禎葛寅亮虞淳熙雲棲釋  
祿宏爲莫逆交精於易學嘗百十人問難辨析不  
窮學者稱庸成先生讀書之暇嘗就西湖爲放生  
社之會有紀異一則別載放生錄中

吳大山

錢塘縣志大山字仁仲居鳳凰山之燕窩

江西副憲源之孫光祿寺卿果之子萬曆時隨父



任京師召試楷書授內閣中書辛卯中順天鄉試  
爲部郎歷任滇南參政皆有聲績未幾乞休歸西  
湖築別業植老桂修篁顏曰輞川

葉永盛

兩浙鹽法志永盛字子木江南涇縣人萬

曆己丑進士爲兩浙巡鹽御史時弁臣言利妄稱  
浙餘鹽山積可得餉三十萬徵之急商絀莫能辦  
永盛具五疏奏入蠲十之九人心始安浙商子弟  
以外籍不得與試特請於朝置商籍視巇之餘集  
內商子弟於西湖跨虹橋西授以題就舫中屬文

面定甲乙名曰舫課去官後商士思之卽其地建  
崇文書院中奉朱子卽以其旁祀永盛焉

李流芳

書畫譜流芳字長蘅嘉定人萬曆丙午舉

南雍再上公車不第遂絕意進取性好佳山水中  
歲於西湖尤數詩酒筆墨淋漓揮灑山僧榜人皆  
相與歎曲軟語間持絹素請乞欣然應之

沈守正

靈隱寺志守正字無回錢塘人爲孝廉清

介絕俗當世士大夫重其守下幃靈隱講業授徒  
歷有年所



唐新 錢塘縣志新字仲可蘭陵人工詩嗜山水愛西湖之勝買舟居之舟名蓮葉往來煙雲浦漵間嘗至絕粒采蓴而食晏如也孝廉吳之鯨憂其乏絕爲疏以傳知已有云唐仲可夷猶煙水欸乃蒼波瓶中不堪喂鼠榜傍可以眠鷗七十二種惟有薄羹一十二時嘗遭水厄一時同事咸相解囊新聞之歎曰吾何可以口食爲諸君子累哉竟謝歸吳之鯨 錢塘縣志之鯨字伯裔文才俊爽高自標置每一脫稿輒付剗刷或規之曰吾以防散逸耳

與馮夢禎黃汝亨相友善所著有武林梵志閬闔詩

吳之龍 錢塘縣志之龍字雪門歙人生有異質讀書一日十行下工詩長游武林遂居錢塘從葛寅亮講學湖南業日進屢蹶不售遂絕意進取謁選得光祿丞與米友石劉半舫諸名卿日唱和詩迅發老健性豪邁不樂繩束還隱西湖結竹閣社四方詞人無不歸之瘦筇過頂白髮飄然人謂地行仙云



袁文玉

錢塘縣志文玉喜山澤游築室柳洲亭左

露桃煙柳間每喜獨行隄畔比遊人出則負杖回  
惡聞簫鼓聲嘗誦左思詩曰山水有清音何必絲  
與竹百有一歲猶強飯健行矍鑠也

曹振

錢塘縣志振字叔周性孝友善讀書好作畫

得北宋人筆意遂以畫名素磊落白異會有以魏  
璫綾帳命畫者振怒擲筆竟出策蹇歸隱西湖白  
號玉岑山樵善搗鼓每酒酣月落鳥履縱橫出羯  
鼓搗之意高氣揚其聲淵淵如風濤驟集座客皆

奮袖起舞年七十九卒葬黃鶴山下

聞啟祥

錢塘縣志啟祥字子將博綜羣書萬曆舉

南雍嘗與吳郡李流芳同與計吏入京師至國門  
忽意不自得趣車徑返後屢以薦被徵悉辭不赴  
靈隱寺志子將絕意仕進築阿西山其言語妙天  
下馮夢禎黃汝亨一流人也

鄒之嶧

錢謙益鄒孟陽墓誌李長蘅愛武林山水

其游也以鄒孟陽爲湖山主人長蘅秀出人表歌  
詩圖繪與湖山相映發孟陽鈞簾據几隗俄其間



山僧舟子皆能指而識之長蘅爲孟陽畫西湖江南卧游冊三十餘幀孟陽所至必攜之以行曰長蘅與江南山水皆在吾篋中矣晚年山水之情彌勝借老僧游天台攜卧游冊曰吾挾此冊與俱長蘅有知當借我越稽溪凌石梁耳其託寄如此孟陽名之嶧世居海寧徙錢塘之東溪

鄒方回

失名

李流芳清暉閣草序余往來西湖者十年得同調之友六七八人鄒方回其一也方回文弱可愛坦衷直腸而遇事慷慨樂緩急人殆世之

有心者客歲孟陽館余於小築子將方回讀書於澄懷閣輒移榻就余商榷文藝旁及歌咏書畫朝暉夕嵐山水變幻輒命觴相對酣飲而後己有時載花月港拜石紫陽采蓴湖心結荷池上未嘗不與方回共之

馮延年

靜志居詩話延年字千秋秀水人祭酒之

孫祭酒愛西湖之勝築快雪堂於湖濬千秋遂入籍錢塘已卯副榜貢入北雍歸隱秋月菴爲復社與子首川父子並著錄云



陳潛夫

靈隱寺志潛夫字元倩杭州人歷官河南

御史爲諸生讀書靈隱山房以名教自任卒能踐

其志

施莊

錢塘縣志莊字康夫居紫陽山少貧力學性

穎異喜自負左方伯吳某極重之延上座莊衣大

布衣著高齒屐踞客座高談今古燭跋不使去義

烏傳巖奇其才以妹妻焉巖成進士而莊屢踏省

闈不見收設館鳳山之陽戶外屢恆滿武林號爲

施氏學

何萃

錢塘縣志萃字輶亦少孤力學與施莊友崇

禎間兩中副車己卯以貢入南雍吳太沖時爲司

成移書吏部曰萃武庫甲兵今朝廷急士當及鋒

用之會爲忌者所阻免歸亦設館鳳山之麓武林

從游者曰何氏學所著有古今治平略廿一史彙

纂類法篇諸書

馮廷槐

錢塘縣志廷槐少參自南公子博洽羣籍

下筆自成一家言晚年自稱二酉山人不求進取

著武林近事十卷



汪汝謙

錢謙益汪然明墓誌然明諱汝謙居歛之

叢睦生三歲而孤嶄然如成人事其母捧手肅容  
視氣聽聲七十年如一日事諸兄若姊同仁均愛  
撫孫恤甥睦嫻收族婚嫁葬埋於我乎取緩急叩  
門無不應所至公卿虛席勝流歛集剡江觀濤之  
客三竺漉囊之僧西陵油壁之妓靡不槃箱捧席  
傾囊倒篋人厭其意留連而不忍去所著有西湖  
韻事

關鍵

錢塘縣志鍵字六鈐與錢肅樂讀書勝果寺

錢引繩墨合規矩而鍵馳騁上下汪洋恣肆談者  
心悸臨川艾南英亟稱之而雲間陳子龍獨首推  
鍵於是有关錢之學癸未成進士知丹徒縣不半  
年棄官歸家居以名德自重絕口不言世事子真  
君平之亞也

顧若羣

仁和縣志若羣字不黨一字超士爲諸生

閉戶下帷縱觀子史究古今治術而擇其可施行  
者說經則觀先儒語錄取新安鷺湖異同之旨會  
通之以餘閒作詩賦古文詞入雲棲隱於緇流所



西海志 卷二十一  
著石公新舊稿

吳本泰 錢塘縣志本泰字美子崇禎甲戌進士以行人改吏部文選郎入爲尙寶卿初籍海寧後樂錢塘河渚而徙居焉遂爲錢塘人本泰性恬淡無嗜好繩牀棊几朝薤暮鹽宴如也其居河渚與高僧耆舊相往來撰西溪梵隱志其弟宮詹太沖稱之曰吾兄如千頃澄波渚之不濁自是德器使然非淺學可測也

江浩

舊錢塘縣志

浩字道闇文昭後裔也與同郡

張岐然季初友善岐然爲尙書恭毅之後兩人創爲古學同時如丁奇遇馮悰虞宗瑤徐騰等約爲讀書社其法因經而及傳先考訂而後辨論武林士人不習矜張而學有原本者由讀書社始也浩久爲諸生落落不得志後落髮隱居河渚盡焚所著書爲名僧曰夢破不入城市一瓢一笠往來蘆風梅雪間自取適意而已岐然後亦爲僧名濟義開堂說法武林名流多與印合二人雖皆爲僧然孤情特立要亦僧隱者也故仍列之隱逸傳中



萍道人 杭州府志 道人名如曉字萍蹤蕭山人善書畫衝口吟哦多佳句出游三吳瓢笠自持爲人方巖孤峭遍游宣歙明剡台宕諸名勝老乃駐西湖結宇烏石峰名曰巖艇崇禎末年卒年八十餘如曉藏名而隱不知其姓所著有草萍集

王元佐 錢塘縣志 元佐字又章重孝義敢任事慕陶靖節孔稚圭之爲人卜居吳山之麓郡守顏其堂曰景陶跡孔

朱東觀 錢塘縣志 東觀字全古崇禎拔貢丙子南雍副榜具經濟才養母於石人隴母亡出游晚乃歸家以涑水通鑑盡爲補注老眼昏花於夾窗下就明處日書之卒年八十

吳山濤 兩浙鹽法志 山濤字岱觀之龍之子崇禎己卯舉於鄉三任學博授陝西成縣令彈丸小邑且當殘破後錢糧協濟民艱甚山濤力請題改邑人戴之任二年致仕投老湖山嘯歌自得書法秀逸自成一家兼善作畫殘絹斷縑皆爲世所珍出塞日賦西塞詩三十首因自號塞翁年八十七卒



國朝

張遂辰

錢塘縣志遂辰字卿子其先江西人父徙

錢塘因家焉少穎異不屑爲舉子業喜讀史漢百家言工古文一游成均由吳江渡秦淮陟金焦過牛渚董其昌陳繼儒見之曰奇才也交李流芳錢謙益輩聲名籍甚幼善病日檢醫遂成名醫博綜典故考究精核湖上有遂辰別業名湖館又有東莊皆有詩

胡介

錢塘縣志介字彥遠幼穎異爲博士弟子性

高介抗意而行後隱於河渚蓬門蘿屋與其妻翁氏笑傲溪山間翁故武林巨族能詩有賢名夫婦唱和欣欣自得介工於詩死後十年淮東黃之翰爲刻以行世

嚴沆

舊錢塘縣志沆字子餐號顥亭明太常大紀

之孫武順之子順治乙未進士選爲館元授兵科給事中仕至戶部右侍郎總督倉場卒於官沆自爲諸生已籍籍人口稱文章經濟之士在諫垣時多所論奏每一疏上人傳誦之性至孝以武順早



西湖志 卷二十一  
卒事母極盡色養於城東築臯園比於臯魚之泣  
復得馮祭酒孤山快雪堂花時常奉板輿侍太夫  
人出游鄉人榮之武順名噪武林與兄調御弟敕  
稱三嚴先生沆能繼世學交游盡南北名流或集  
東園或會湖莊尊壘茗椀酬唱歌吟殆無虛日所  
入俸錢宗黨之外盡以給朋友焉

錢士璉

錢塘縣志士璉字奇玉郡諸生嘗游學東  
甌值山寇竊發海氛未靖璉佐掾幕出奇計定之  
浙東諸郡賴以安堵又嘗勸禁倖掠出株連人高

其義當事欲疏薦不受黃冠野服日徜徉湖山間  
年八十七壽終

錢士璋

錢塘縣志士璋字章玉諸生負經濟才歲  
大祲當事爲粥以食饑者士璋計口授餐民皆果  
腹道有殍死者出私財瘞之民苦徭役建議立條  
鞭法以均之著爲令薄游天台因號赤霞山人後  
歸西湖見石山壁立有篆刻赤霞字符其號遂築  
菟裘終老焉

林嗣環

錢塘縣志嗣環號鐵崖泉州人順治己丑



進士授廣西海南副使攝學政愛養士子後削秩歸慕武林山水僑居湖上與曹秋岳王西樵相倡和卒葬西湖之白沙泉

王猷定

舊浙江通志猷定字于一別號軫石南昌

人善古文爲人倜儻自豪寓居西湖歿於昭慶僧舍嚴津陸圻毛先舒爲治喪櫬猷定爲文鬱勃如殷雷未奮又如崩崖壓樹槎枒盤礴旁枝得隙突然干霄或間露卑率語然蒼骨老氣終不可沒也

吳名溢

錢塘縣志名溢字我匏錢塘諸生時婁東

甬上諸名宿舟車絡繹皆主其家兩喪皆廬墓著喪禮注築匏菴於南山滿覺隴遂自號匏菴晚年又構葯園於城東彙名流觴詠之作爲葯園盍簪集查繼佐序其文云明季文體詭變尙諸子雜說仙釋語錄聱牙佶屈之文匏菴獨沉酣六經闡發實義作麟經詮解考三傳互異折衷諸家爲春秋詳註嚴沆嘗語人曰林巒標致當推是公非晚近人也卒年七十六

孫治

錢塘縣志治字宇台少穎異通左國春秋喜



秦漢文故其為文沉鬱入古為諸生祭酒隱居教

授講學湖濱自稱武林西山樵者撰靈隱寺志西

洽十子其一也

十子陸圻麗京柴紹炳虎臣孫治宇台陳廷會際叔張綱孫祖望毛

先舒馳黃丁澎葑園沈謙去矜吳百朋錦雯虞黃吳景明圻著威鳳堂文集二十卷詩集十四卷口

譜十卷靈蘭墨守十卷紹炳著翼望山人集十卷古韻通五卷治著孫氏遺集十六卷靈隱志十二

卷遺興集十二卷廷會著瞻雲遺集十六卷綱孫一名丹著從野堂文集二十卷詩集二十卷先舒

一名騷著選書隱囊別紀韻學通指匡林思古堂集詩辨砥格物問答聖學真語澎著扶荔堂文集

二十二卷藥園詩集十二卷詞集六卷謙著東江集八卷百朋著樸菴集三十二卷

丁景鴻 杭州府志景鴻字弋雲領戊子鄉薦嘗結

社於兩峰三竺間有鷺山十六子之訂因號鷺峰

丁文策

錢塘縣志文策字叔范號固菴學者稱江

樵先生文策束髮讀書為文另闢堂奧時流翕然

宗之已而謝浮名自號布衣奉其母偕隱河渚當

事聞其才屢辟不就兩應督撫之聘纂修通志及

郡志所著有西湖集瑣言放庸集吳聲百歲序譜

諸書傳於世

吳文翰

杭州府志文翰字元濬有至性讀書攻苦

幾失明補郡庠生亡何入龍泓山中懷古著書與



方外為蓮社游詩歌寄託高遠有陶韋風規

西湖志卷之二十一 總校王詒壽分校王彥起瑛校

西湖志卷之二十二

方外

武林諸山滙為聖水不獨人傑鍾靈亦仙佛化身地也蓋從古高真徒侶多託跡於名勝之區矧自白蘇守郡雅愛談禪吳越封山傾心嚮道嗣爾趨風接軌皆足增勝湖山裒集見聞聊以備外史之掌故云志方外

晉

道教



葛洪

晉書本傳洪字稚川句容人少時尋書問義尤好神仙導養法從祖元得仙以丹術授弟子鄭隱洪乃就隱學悉得其法後師鮑元元以女妻洪洪傳元業兼綜醫術明聖湖觀稚川隱西湖山以仙著初聞郭文舉在大滌造請焉修真著書號抱朴子

許邁

真靈仙業圖邁字叔元小名映改名遠遊東華署爲地仙晉書本傳邁句容人少恬靜不慕仕進南海太守鮑靚隱跡潛遁邁往候之採其至要

謂餘杭懸雷山近延陵之茅山是洞庭西門潛遁五嶽陳安世茅季偉常所游處於是立精舍於懸雷而往來茅嶺之洞室永和二年移入臨安西山登巖茹芝有終焉之志著詩十二首論神仙之事

西湖遊覽志稽留峰卽遠遊嘉遜之所

裴仙姥

方輿勝覽東晉初有裴氏姥採衆花醞酒貧者貰與之經數年忽有三人至姥所各飲數斗不醉謂姥云予非常士知姥當仙故來相命因授藥數丸姥餌之月餘不知所在名勝志姥餘杭人



嫁於西湖農家錢塘縣志今柳浪有仙姥墩曹唐小遊

仙詩入景風回五鳳車崑崙山下看桃花若教使者沾春酒須覓餘杭阿母家

杜子恭 宋書自序子恭錢塘人通靈有道術東土

豪家及京邑貴望並事之為弟子執在三之敬搜

神後記子恭嘗就人借瓜刀其主求之子恭曰當

即相還耳既而刀主行至嘉興有魚躍入船中破

魚腹得瓜刀南齊書孔稚珪傳稚珪父靈產有隱

遁之懷立館事道東出過錢塘北郭輒於舟中遙

拜杜子恭墓神州古史考杜子恭者神方驗於晉

史冢墓載於齊書蓋黃公道術之流葛洪神仙之比也

唐

馬湘 太平廣記湘字自然杭州人治道術遍遊天

下所遊行處或宮觀巖洞多題詩句聞奇錄自然

貌醜臙鼻禿鬢大口飲酒石餘醉卧即以拳入口

人有疾病告之折薪草呵而與食無不差者嘗吟

曰昔日曾隨魏伯陽無端醉卧紫金牀東君謂我

無情賴罰向人間作酒狂後往梓州上昇詩話類



編候潮門外水府淨鑑觀其修煉之所也

薛應旂書馬湘

傳後嘉靖三十九年余修浙志將置仙釋七月二十四日有神附鸞書曰丹陽道人馬自然煩大夫修作不可舍我也余曰將欲修入志中乎曰然曰我不甚知公出處奈何鸞書曰考西湖志餘見予蹟也

李昇

神仙通鑑昇字雲舉自言江夏人性高古師

少室山道士學煉氣養形之術嘗布衣游行天下時元微之廉察浙東白居易出牧錢塘以昇舊友皆慕昇之文學道術邀致賓席間問昇生當太平之世何不受榮祿而久為布衣乎對曰不為世累

召之亦不就乃徐吟曰生在儒家遇太平元纁重

滯布衣輕誰能世路趨名利臣事玉皇歸上清元

與白奇之詩酒延留歲餘復去他適莫知所之

錢朗

神仙通鑑朗字內光南昌人開成初為安南

都護副使後為光祿卿歸隱廬山師東嶽道士徐鈞得補腦還元復鍊長生之術昭宗世錢塘彭城王錢鏐慕朗得道長年乃迎就錢塘師事之時朗已一百五十餘歲童顏輕健元孫數人皆以明經

進身仕為宰官



五代

張契真

十國春秋契真錢塘人生有異相青骨方

瞳形如瘦鶴幼負篋從胡法師游已而道遇宋天師一見喜曰子骨法應得仙授以要訣未幾復受樊先生靈寶籙獨處真聖宮數年繙繹蕊笈琅函之秘深得微旨忠懿王命主三籙齋事

宋

張用誠

三洞羣仙錄天台張伯端字平叔嘗罄所

得吟成律詩九九八十一首號曰悟真篇其九轉

金液還丹詩一篇云黃芽白雪卒難尋達者須教

德行深四象五行全藉土三元八卦豈離壬鍊成

靈質人難識消盡陰魔鬼莫侵欲向人間留秘訣

未逢一個是知音瑞石山志平叔自號紫陽元豐

五年三月十五日蛻去名勝志瑞石山左紫陽洞

宋張平叔元徐弘道俱修真於此七修續稿楊沖篤好仙術一日

遇相士於吳山日有客寄書於宅君知之耶歸果得書開緘則仙人張平叔拜帖也

國朝雍正十一年

勅封大慈圓通禪仙紫陽真人

西湖志

卷二十二 方外一

五



車四  
兩浙名賢外錄四不知何處人青巾布袍修  
髯偉幹有黃白術好飲酒一吸數斗不醉嘗往來  
西湖山水間

皇甫坦  
宋史方技傳坦蜀之夾口人善醫術高宗  
召見問以長生久視之術坦曰先禁諸欲勿令放  
逸丹經萬卷不如守一帝歎服書清淨二字以名  
其菴神仙通鑑坦字履道遇朱真人傳內外二丹  
之訣一日見頂門有珠光燄因歌曰山頭紅日出  
藥苗新欲將心事付瑤琴知音少絃斷有誰聽識

者以爲丹成之驗紹興二十七年顯仁太后得目  
疾國醫不能療忽夢黃衣道人長鬚廣耳太后問  
能醫眼否曰能覺而異之以語高宗時坦南游自  
僂眼醫臨安守張僊以名聞宣至慈寧殿爲太后  
噓呵布氣良久翳開目明喜曰真夢中所見也將  
還山留一扇於禁中曰有發寒熱者以此扇之當  
差未幾宮中多患瘧用之皆驗隆興元年上皇御  
札詔至宣見於康寧殿乃命館於西湖顯應觀西  
齋堂乾道初游武當上皇遣德壽宮使臣陳球宣



召二年二月至行在

館命登御舟泛湖游

賜御書靈寶度人經

甫真人像贊皇甫京其年間雲在空孤鶴

王元悟 通元觀志云

有五色雲遂登絕頂

設三道像供以香花

下山者三十年一日

一寸光陰一寸金結

皇面天不高兮海

祖師

蔡道象 通元觀志

遇風舟不能進問

有茅君焉禱之立

人頃之不見訪其

感江中之事遂賜

觀事以道象主焉

齋輒有仙鶴百餘





其山

李笑 神仙通鑑濟南李笑字定國寓臨安軍營中以聚學自給暇則縱游湖山嘗詣淨慈寺過長橋於竹林迷路見青衣道人斲笋笑揖之道人問所往曰將往淨慈瞻禮五百羅漢道人曰未須去且來同食燒笋食之甚美俄而風雨晦冥失道人所  
在少頃雨止而出至寺門覺身輕神逸行步如飛歸舍不復飲食其從兄大猷爲諸王宮教授將之任遣僕致書見其顏如桃紅且能辟穀以語大猷

及大猷至則已去云遊茅山矣後又聞入蜀隱青城山大猷後爲梓州路提刑使人至眉訪之眉守報云數年前已輕舉乘雲而去今惟繪像存焉

武道光 畫髓元詮道光錢塘人東太乙宮道士善潛補六朝古名畫又能作花鳥窠木竹石

張守真 神仙通鑑守真字遵一生而純素守靜長而寡慾宋紹興十年承襲世教賜號正應先生乾道六年高宗詔赴德壽宮館於養魚莊命醮月臺祈禱有異應越明年復召見以上清三洞諸品寶



西泠志 卷二十一  
錄流傳寢久乃錫金委道錄院鈐木成書就延祥  
觀傳度

白玉蟾 紫桃軒又綴白玉蟾本姓葛閩清人父亡  
隨母改適雷之白氏因改姓名神仙通鑑玉蟾號  
海瓊子得翠虛陳泥丸先生之道喜飲酒不見及  
醉博洽儒書究竟禪理大字草書視之若龍蛇飛  
動兼善篆隸尤妙梅竹受上清籙行諸階法所用  
雷印常佩肘間祈禳輒有異應嘗游西湖至暮墮  
水舟人驚尋不見達旦則先生在水上猶醺然也

續文獻通考嘉定中命館太乙宮一日不知所在  
封紫清明道真人有上清武夷二集行世畫髓元

詮玉蟾嘗畫祖師張平叔薛道光及自己像

陳旅題白

玉蟾贈劉丹晨暑月詩後詩玉蟾先生列仙儒夙昔夢見冰雪如丹晨不比劉師服彌明本解人間書紫清午榻松陰冷俯視塵寰真大井銀河夜靜淡明月水風吹落元雲影元雲盤屈龍虎章百神守之不敢將張昱題白玉蟾像詩白玉如蟾俱是妄青天指月亦非真武夷洞裏曾相見卻是尋常人

葉文詩 兩浙名賢錄文詩麗水人本儒家子為天

慶觀道士時稱葉書記嗜酒善詩畫山水人物每



閉戶輒經月不出出則羣小兒環之或有與之衣  
 與之錢者悉隨手散之路人嚴寒時常浴溪中寶  
 祐甲寅十二月朔日浴于觀池擲其衣獨臂二草  
 履作偈曰似癡非癡似醉非醉竹杖芒屨落魄半  
 世喫清風明月逍遙流水白雲自在端坐靜室而  
 逝既葬人或遇於路跡之竟不見時皆以為仙云

張達道 西湖遊覽志 達道凝神菴道士高宗嘗賜

白羽扇至元猶存 薩都刺同張伯雨游凝神菴因  
觀宋高宗賜蒲衣道士張達道

白羽扇詩晴日赤山湖水明湖中山影一  
眉清蒲衣道士無人識羽扇年多落鳳翎

髻髻道人 齊東野語 端平間別文璞趙師秀數詩

人春日薄游湖山釅飲西林橋酒壚皆大醉熟睡  
 忽有髻髻道人過而睨之哂曰詩仙醉耶願酒家  
 善看客我當償酒錢索水以瓢中藥少許投之入  
 口略嗽嘆之地上則皆精銀也時游人方盛皆環  
 視駭歎忽失道人所在薄暮諸公始醒酒家具道  
 所以皆悵然自失其家持銀往市得錢正可酬所  
 值了無贏餘明日喧傳都下酒家圖其事於壁自  
 以為遇仙酒肆好事者競趨之遂為湖山旗亭之



甲而諸公亦若有悟云

陳崇真 西湖志類鈔崇真宋咸淳間羽士善雷法因敕建雷院以居之賜號冲素真人

吳山道人 括異志三山曾陟館於海鹽陳氏七載有道人自吳山來謂曰子思鄉切何不暫歸乃剪紙爲馬令合眼上馬以水嚙之其疾如風囑曰汝歸不可久留須與到家門戶如舊妻令入浴易新衣陟曰我便去妻曰纔歸便去何不念父母妻子乎陟便上馬行所騎馬足折驚寤乃自在書館中

隨身衣服皆新製者道人亦不見惟留一藥籃中有詩云一騎如龍送客歸銀鬃綠耳步相隨佳人未許輕離別不是仙翁豈得知

元

莫沾乙 名山藏沾乙號月鼎入青城山丈人觀見無極受五雷法用是召雷雨破鬼魅動無不驗祕笈杜徽之夏日嘗隨莫月鼎入西山至湖上熱甚月鼎曰吾借一傘與汝其戴之乃向空嘘氣忽黑雲一穗隨而覆之宗陽宮志沾乙錢塘人元世祖



欲聞雷擲胡桃應聲而發贈金繒碎以濟貧者一  
日偕客游西湖客畏日浮果殼觴面雲起湖中翳  
日光市魁娶妻為北高峰白猿所攝呼颺追婦歸  
靈異多此類

郎如山楊清一

洞霄宮志如山字魯瞻餘杭人精

教典師洞霄明一先生宋景定間居延祥館至元  
丁丑開山西湖崇真觀逾年領洞霄宮主席西太  
乙宮掌浙西道道教戊子三月御史中丞崔彧尋  
訪高道以公入觀暨乞歸奉旨蠲宮門租賦元貞

初授體元崇教安道法師賜宮錦金衣一襲一日

謂徒眾曰吾不久斯世汝等當勉勵進學勿羨吾

榮壽七十有三其徒楊清一字元潔臨安人精於

符法為東太乙宮法師至元後改陞西太乙宮繼

郎席丙申秋以郎命捧香詣闕郎賜衣亦與焉授

沖真洞元葆光法師

張礎宜晚堂呈郎如山詩心  
自空清境自真夕陽林下著

聞身山中一段煙霞晚物外三生造化春大厦規  
模原內景小冠丰采是高人扁舟且莫彝陵去我  
欲溪頭  
一問津

馬臻

元詩選傳臻字志道別號虛中少慕陶貞白



之為人著道士服隱於西湖之濱大德中從天師張與材至燕京行內醮未幾辭歸手畫桑乾龍門二圖傳於世所著曰霞外集

王壽衍

輟耕錄壽衍字眉叟杭州人出家為道士

受知晉邸後以弘文輔導粹德真人管領郡之開元宮浙省都事劉時中者名士也既卒貧無以葬躬往弔哭周其遺孤舉其柩葬於德清縣與已壽

穴相近春秋祭掃不怠

馬祖常送王眉叟真人詩秋蟬上寒竹白鶴立蒼苔

石洞松花落雲房澗水來彈琴翻道曲擣藥應猿哀別浦迴船急孤山看早梅張大雨壽溪月真人

木蘭花慢詞試瑤臺借雪春意早滿林巒笑東老殷勤能傾家釀興盡清歡曾因求賢把詔便朗吟溢浦又廬山自愛西湖煙雨玉鞭分付青鸞神仙官府閑樞要在元關有溪上金鼈月中金粟長駐嬰顏願似洪厓橋口儘千年游戲向人間早晚鳳池書到通明殿上催班

張雨

堯山堂外紀一名天雨字伯雨錢塘黃冠號

真居九成之裔後入華陽洞自號句曲外史初見虞伯生伯生問能作幾家符篆曰不能伯生日某試書之以質是否連書七十二家伯雨輒下拜曰真吾師也自是託交甚契與伯生書必稱弟子太平清話伯雨素不善畫嘗醉寫奇石具一種逸韻



為雲林所稱仙里塵譚伯雨少學琴畜一琴名風

林嘗從趙子昂論琴以為琴之五音各有改絃法

其法不傳世之所謂琴者皆不審五音之主徒呶

呶耳殆不如秦箏之按宮徵也倪瓚寄張伯雨詩  
林卧對雲雨憂來

不可絕褰帷望庭際春風動林樾飛蘿散成霧煙

草綠如髮不見高世人飢渴何由歇神鸞戲元圃

巨鱗偃溟渤爾亦碧巖中遁形修隱訣燒香庭竹

淨洗研池苔滑取瑟和流泉操觚酌明月跡高行

亦苦冰檠忌芳潔何當往相尋拂石棲松雪薩都

刺寄句曲外史詩霞珮翩翩出洞天當時彷彿見

癯仙幾年海上張公子今日山中葛稚川滄海塵

飛丹已熟玉堂人去榻空懸林間載酒來相覓乞

寫丹經與世傳張翥中秋張外史招賞月失約賦

謝詩明月中天霧氣消酒醒涼思正飄飄星河不

動秋空闊鐘鼓無聲夜寂寥露下遠山皆落木風

來滄海欲生潮仙家玩事無緣到虛負瓊樓聽玉

簫李暈題張雨隱居詩愛君亭子澗之涯不減西

湖處士家長日春風吹杜若有時流水出胡麻山

童斬竹供垂釣野客尋源憶泛槎欲信神仙在人

世重來猶恐失桃花張炎作水墨水仙寄張伯雨

浪淘沙詞青霧濕雲鬢蕊佩珊珊酒醒微步晚波

寒金鼎尚存丹已化雪冷虛壇游冶未知還鶴怨

空山蕭湘無夢繞叢蘭碧  
海茫茫歸不去卻在人間

王應瑾 徐一夔王真士壽藏碑銘真士錢塘人名

應瑾景丹其字也生時母夢紫氣滿室稍長氣韻

凝重識者曰此道器也年十八從鶴林宮沈日瑞

度為道士佑聖觀者故宋孝宗之潛邸也星冠霞



珮之侶集焉真士入處其觀之延真館精究元業  
德譽日隆其後遂為元門尊宿四十二代天師昇  
號教門高士洞微真隱純一法師住持元妙觀同  
領本府諸宮觀事性至孝父母歿購地五畝於南  
山之金沙鳴葬之俾其從子奉祀故楊廉夫張伯  
雨情好甚篤初謝龍翔之席歸延真館疏種藥畦  
作淡竹亭浚天一泉置吹笙石築馭鶴臺而日逍  
遙其間曰吾聊以盡吾之有夜旦者爾他無所為

也張昇東圃為道士王景丹賦詩東圃軒在元武宮海日欲上煙飛紅若人餐之百體充養得面

貌如嬰童上清有法授有宗靈章秘咒存心胸一氣孔神天與通右衛白虎左青龍擲火萬里行老翁欲雨即雨風即風變理造化代天工事親則孝君則忠神人執鞭須相從

徐弘道 紫陽道院志弘道號洞陽修真瑞石山年

八十三沐浴更衣書頌而蛻有不離本性即神仙  
之句得法弟子丁野鶴也弘道常感張平叔住山  
傳訣故菴名紫陽云

丁野鶴 武林紀事野鶴錢塘人棄家為全真道士

於吳山之紫陽菴紫陽道院志野鶴師徐洞陽沿  
門誦經受少許米不他丐元宵眾以月供齋競談



吳門燈之盛令各閉目目啟而燈見久之眾歸往  
謝之曰更能化羣鶴爭起捕所化鶴皆紙也鶴鳴  
人喧忽反顧丁作控鶴坐而化漆身祀焉先是召  
其妻王守素付之偈曰懶散六十三妙用無人識

順逆兩相忘虛空鎮常寂妻感其言亦為女冠

范涑

紫陽碑記丁翁野鶴坐茅二十年蛻化顯白鶴之  
異而山靈益著王表紫陽菴觀丁野鶴真身詩客  
本山中人還向山中息伐毛滄海上煮石青崖側  
鶴胎養元化蟬蛻遺金骨此身亦非我去來偶相  
值丹砂悞時人空復鍊形質山房夜不扃孤猿嘯  
寒月王禪登紫陽菴丁真人祠詩丹壑斷人行琪  
花洞裏生亂厓兼地破羣象逐峰成一石一雲氣  
無松無水聲丁生花鶴處蛻骨不勝情莫如忠紫

陽菴弔丁野鶴詩紫陽樓觀鎖煙霏上界鐘聲落  
翠微無地可逃車馬跡有山即與市朝違林端遠  
漱千峰影郭裏晴嵐萬樹暉試問  
昔人能羽化前身好是合威非

王守素

輟耕錄錢塘民家女其夫鶴化遂亦束髮

簪冠著道士服奉遺屍二十年迹不下山年逾七

十幾於得道者瑞石山志守素入山修道途中拾

得樹一株持歸植於山中祝曰我若功成願汝成

林後二十年樹已成林守素即化去相傳葬於元

天殿之臺前樹名成道樹

薩都刺贈王守素詩不  
見遼東丁令威舊遊城

郭昔人非鏡中春去青鸞老華表山空白鶴歸石  
竹淚乾斑雨在玉簫聲斷綵雲飛洞門花落無人



迹獨坐蒼苔補道衣

俞行簡

通元觀志

行簡名真靜嘉禾人元順帝時

住持三茅觀後主本觀深明道法博通儒典兩浙

祈禱輒應貫雲石虞伯生張仲舉輩咸有詩贈焉

貫雲石贈俞行簡法師詩遁迹復忘形丹成養性

靈精誠動神鬼呵叱走風霆鶴去松雲滿龍歸雨

氣腥送師歌短曲涼吹滿江亭虞集贈俞行簡法

師詩仙壇遙接上真宮吳越江山一望中南北兩

峰雲杳靄東西三浙雨冥濛經聲旋動仙音作樓

閣縈迴複道通雲鶴仙人無定跡鸞輪時輾望三

峰張翥贈俞行簡法師詩羽蓋翩翩下九重江鄉

秋晚滯仙蹤信傳真府憑青鳥劍舞瑤臺走碧龍

頃刻風雲興五嶽須臾雨澤慰三農

殷勤欲問參同契雙鳥遡飛未易從

陳渭叟

成化杭州府志

渭叟杭人讀書學道不混

俗不忤物賦詩有天然趣隱居葛溪上歲一來杭

城中名人勝士爭要致之

葉森題紫雲編詩一度詩來一見君只應芳杜

襲蘭薰有詩寫到游仙句繞筆秋香生紫雲張翥

寄渭叟詩忽憶江南古莊叟釣竿歸去拂珊瑚藥

鑪已熄勾庚火書篋閒拋遁甲符欲與陳陶同啖

鮮祗令張翰遠思鱸不知別後詩多少刊到雲編

無戊己

董嗣杲

成化杭州府志

嗣杲字靜傳錢塘人寄跡

黃冠中博辨強記談前朝典故如指諸掌作詩詞

不經思索下筆輒成有西湖百詠詩行世



明

冷謙

〔泳化類編〕謙字啟敬號龍陽子元中統初與劉秉忠從沙門海雲游博學精於易尤深邵學及百家方術靡不洞習至元間於四明故相家觀李思訓畫因契之遂以善繪名後遇異人授中黃大丹傳張氏契真之旨年百餘歲如童顏成化杭州府志謙錢塘人隱居吳山頂上曉音律善鼓琴飄飄然有塵外之趣洪武初授協律郎不知所終

周思得

〔兩湖塵談〕思得杭城人少學符術永樂中

召赴京寓大德觀祈禱雨晴呼召風雷累應每朝廷有問則中貴齋御封詞旨赴觀設香案焚之周不與知也頃之神降則歷歷指陳如見一日神降頗怒周曰有旨故敢召何怒為神曰小事可賣吾耶周問奚小事神曰失一狸奴耳誤入某閣仰塵板中無恙也果於其處得狸奴其他靈驗不可殫紀嘗取諸家科範纂為大洞金書行於世累封高士真人宗陽宮志尸解時年九十三敕葬八盤嶺

〔明成祖勅〕爾周思得體尚淨虛術超靈異祈旱魃而甘霖立沛闢正法而魑魅潛踪功績顯然用倣



古制授官給符爾其守真勿懈  
奉道益虔弘闡元宗用副朕意

紫道人

續文獻通考道人善祈禱永樂中浙中大

旱延至設齋壇三日後雷響一聲壇前二幡結成

二龍頭雨如注西湖水涸其大半

徐道彰

許仁徐法師傳道彰號凝虛職任真人府

贊教住通元觀能採三光之氣治穰兒之失明行

紫庭追蟲法救癆瘵於幾危者遐邇醮禳必延請

焉所獲金帛建三清等殿法相器具聿新築丹室

數椽潛身修煉足不踰外者十數年至癸未長夏

既望山亭忽有羣鶴飛鳴師乃囑徒曰後三日我

當去矣至期索筆書偈趺坐而化滿室異香竟日

不散

畢宗敬贈徐法師詩仙房四遠石為基景物  
清幽足賦詩綠竹陰濃春寂寂紫藤花落晝

遲遲潮生海口拖銀練月到天心瀉玉  
卮老道凝虛清不寐焚香獨坐遣三尸

閻蓬頭

萬曆錢塘縣志閻蓬頭居雷峰最久冬浴

冰水暑坐溺缶出而暴之無穢氣勸人行陰隲與

巨公游且築巨麗宮觀一日坐逝吳毛百戶家

卓晚春

名山藏晚春莆田人生嘉靖間自號無仙

子亦曰上陽子人呼為小仙八歲善算雖累千萬



不爽言休咎皆奇中初不識字十四能詩十六善  
草書唐順之作小仙草書歌有瓊譎東海黃公符  
蒼古太廟姬王琢藤纏老樹千尺挂鷹攫寒厓百  
鳥慙之句當道召之輒與抗禮冬月履霜雪著黑  
麻布裙背加青紗帕子而已雖寒夜必露宿石上  
或走浴溪澗飲水十數甌曰漂我紫金丹也後脫  
化於杭州淨慈寺

俞大彰

重陽菴集俞賓梅名大彰字用昭別號海

空吳山重陽羽士也禱雨禳災芟邪輔正歷五十

餘年隨試輒效杭地遠近咸以神異稱之

熊遠飛龍吟重

陽羽客青衣仙異書勘破三十年芟治祈禱悉貫  
熟試之捷於聲應谷昨宵一札下龍潭海蛟競起  
來東南江翻海立雨如注霹靂轟空人駭避槁苗  
賴之頃淳然更倩何人補漏天官民酬功饋以物  
長嘯卻之兼自律且云厥功非我有太真冥冥  
假吾肘物不奪志功不居飛龍之詩豈易書

祝小仙

兩浙名賢外錄小仙粵人來游西湖寓於

藕花居藕花居者高儀之別業也儀一日訪之小  
仙曰汝卧此汝卧此儀未幾卒竟築其地為墓後  
尸解三聖橋復有遇諸粵者曰為我寄聲以謝武  
林諸舊好云



許源

萬曆錢塘縣志源號野雲棄武弁自滇遊蜀

遇藍斗篷得訣居斗牛宮俄南來修煉表忠觀傍  
以卻病方致貴游而實承王馬之派變貌須臾若  
八公年百八歲書頌坐蛻

國朝

孫道元

杭州府志道元字善長號復陽子桐川人

父嘗遇羽客修髯長身曰君當舉子是垣中一星  
言已卽去初生時不啼不乳者累月嗣若聞空中  
有語者然遂受乳甫七齡求出家父母知其有夙

根送吳山火德廟度爲道士二十四訪游五嶽盡  
得要妙過信州張真人授以正一清微五雷大法  
示曰大道必積功行藉以福國利民若獨善其身  
德不被物雖得長生猶殤子也由是以救濟累功  
以參煉彌性習靜大滌山年七十有四剋期示化



西湖志卷之二十三

總校王詒壽分校

王彥起  
孫 瑛校

西湖志卷之二十三

方外二

釋教

晉

慧理

佛祖統紀咸和元年西天沙門竺慧理至錢

塘武林山驚曰中天竺靈鷲小嶺何年飛來此地

耶因名天竺山曰飛來峰建寺曰靈隱釋氏稽古

略飛來山有洞舊有白猿呼之應聲而出宴坐之

巖號理公巖今瘞塔存焉

西湖夢尋師常畜黑白  
二猿每於靈隱寺月明



長嘯二猿隔岫  
應之其聲清激

寶掌

西湖高僧事略中印土人魏晉間東遊自云  
六百七十三歲周威烈王十二年丁卯生左手握  
拳有珠在掌中因以為名始抵峨嵋五臺南返衡  
廬入建鄴與達磨遇於梁朝遂叩法焉洎來二浙  
愛天竺之勝結茅而居者四十五年後往四明天  
台及諸名山遊歷將遍唐貞觀十五年還竺峰久  
之移居浦江寶巖顯慶二年正旦手握一像九日  
而成與其貌無異即告徒曰吾誓住世千載自來

支那忽四百歲今已過七十有二年矣說偈而化  
世稱千歲和尚遺記滅後有僧來取吾骨勿拒越  
五十四年刺浮長老至彼作禮塔戶倏開得其骨  
皆連鎖金色因持來別建塔藏之為中竺開山始  
祖

南北朝

智一

靈隱寺志智一法師劉宋時居靈隱山半峰

精守戒範而善長嘯養一白猿有時不還乃吮吻  
張喉林木振響則猿至矣謂之白猿梵稱為猿父



故今有飯猿臺鄞環史睡智一善嘯有長松之韻時名哀松梵

曇超 佛祖通載沙門曇超居錢塘靈苑山一夕有

神人至曰此邦蒙師留蒼生之福然富陽民無故

鑿山麓斷壞羣龍之室龍忿不致雨今二百日矣

欲師一往誨龍為蒼生請福豈有意乎超曰此檀

越事吾何能為哉神曰弟子力能吐雲不能致雨

超諾之至赤庭山為龍說法俄大雨縣令聞超在

辦舟迎之超即日遁還靈苑西湖高僧事略超姓

張氏清河人常夜講經有一老人來聽詰之曰我

龍也師曰吾此地無水汝能致之乎老人即撫掌

泉自湧出今玉泉是也宋嘉定三年賜號靈悟大

師

寶達 高僧傳號刹利法師常持密咒浙江潮大至

激射湖上諸山遠哀其桑麻之地悉變為江誦咒

止之夜有偉人元冠朱衣謂曰師慈心為物員聞

命矣自爾西岸沙漲後罔知所之靈隱寺志寶達

不知何許人晦迹武林山住刹利院因名刹利禪

師孫治治潮皆靈隱僧論僧都統贊寧與知覺禪師延壽建塔創寺於江干以鎮之而潮循故道



是其一也前南齊時驚濤為害寶達誦秘咒累日  
吳行人形見於夢而潮擊西興東岸以平又其一  
也洪武初海潮崩岸壞民廬舍照菴慧炬時居理  
公巖為湖神說三皈戒楊枝灑處即止不崩又其  
也一

隋

貞觀

〔西湖高僧事略〕觀字聖達錢塘范氏子世本

顯仕生有奇相出家通經律論尋謁天台智者請  
授禪觀智者以師齊年止為法兄弟開皇十五年  
於靈隱山頭陀石室宴坐眾建南天竺寺請師居  
焉是為開山始祖常講法華以心為要大業中示

寂天中記觀左手仙文右掌人字口流津液充潤  
榮府八歲通詩禮和庾尚書林檎之作沙門洪偃  
面相謂曰觀高多知耳白有名我有四絕爾具八  
能謂義導書詩辨貌聲基是也時人語曰錢塘有  
貞觀當天下一半

唐

靈一

〔高僧傳〕靈一姓吳氏廣陵人寶應元年圓寂

於杭龍興寺禪誦之隙賦詩興會飛動與天台道  
士潘志清襄陽朱放南陽張繼安定皇甫曾范陽



張南史吳郡陸迅東海徐凝景陵陸鴻漸為塵外

之友

劉長卿寄靈一上人詩高僧本姓竺開士舊名林一去春山裏千峰不可尋新年芳草遍

終日白雲深欲徇微官去懸知訝此心姚合寄靈

一律師詩梵書鈔律千餘紙淨院梵香獨受持童子病來煙火絕清泉漱口過齋時

道標 西湖高僧事略富陽秦氏子年七歲有沙門

遇而識之勸令出家至德二年詔通佛經七百紙

者命為比丘師中選得度居南天竺寺嘗於靈鷲

峰之南西嶺下葺茆為堂人稱西嶺和尚高僧傳

為靈隱白雲峰海和尚弟子經行之外尤練詩章

當時吳興清晝會稽靈澈相與酬倡諺云雪之晝

能清秀越之澈洞冰雪杭之標摩雲霄

澄觀

慈雲志觀字大休會稽人姓夏侯氏天寶七

年出家至肅宗二年丁酉受具是年奉詔入內敕

譯華嚴建中二年駐錫此寺大闡華嚴教部天降

甘露應之

韓愈送僧澄觀詩愈昔從軍大梁下往來滿屋賢豪者皆言澄觀雖僧徒公才

吏用當今無後從徐州辟書至紛紛過客何由記

人言澄觀乃詩人一座競吟詩句新向風長歎不

可見我欲收斂加冠巾洛陽窮秋厭窮獨丁丁啄

門疑啄木有僧來訪呼使前伏犀插腦高頰顧惜

哉已老無所及坐

睨神骨空潛然



守直 神州古史考錢塘范氏守直字堅道齊信安

太守理之八葉具足律儀立願誦法華經夢神人

施珠一顆及覺炯炯在握住靈隱峰大曆五年官

龍興淨土院

道林 錦繡萬花谷杭州道林禪師見秦望山有長

松枝葉盤屈如蓋遂棲止其上人謂之鳥窠和尚

後有鵲巢其上自然馴狎名勝志元和中白居易

守杭入山訪師謂曰師住處甚危險答云太守危

險尤甚白曰余忝郡守何險之有師曰心火相交

識浪不停得非險乎公悅西湖高僧事略師富陽

潘氏子幼出家詣長安西明學華嚴代宗詔國一

禪師至闕師謁之得法南歸長慶四年入滅塔於

北山喜鵲寺來復西湖雜詩寶網金幢變劫灰瞿

曇寺裏盡蒿萊鳥窠無樹山夔泣不見談禪太傳來

續空 纂異記齊君房家於吳元和初游錢塘至孤

山寺西餒甚有胡僧顧君房笑曰法師諳秀才旅

遊滋味否君房曰旅遊滋味即是矣法師之呼一

何謬哉僧曰子不憶講法華經於洛中同德寺乎



探鉢囊出一棗大如拳日食之知過去未來事君

房食訖而寢頃刻乃悟講經如昨焉至靈隱寺剪

髮具戒法名鑑空靈隱寺志續空一作鑑空師姓齊名佐

會通 景德傳燈錄會通禪師杭州人姓吳氏本名

元卿德宗時為六宮使尋得鄉信知母病乞歸會

韜光法師勉之謁烏窠即與披剃具戒師常卯齋

晝夜精進誦大乘經而習安般三昧尋固辭遊方

烏窠以布毛示之悟旨時謂布毛侍者西湖遊覽志餘今招

賢寺乃會通道場

韜光 一七修類彙韜光禪師莫詳族里唐穆宗時結

茅靈隱寺西峰巢构陽與烏窠布毛為友刺史白

居易常具饌以詩邀師答云山僧野性好林泉每

向巖阿枕石眠不解栽松陪玉勒惟能引水種金

蓮白雲乍可來青嶂明月難教下碧天城市不堪

飛錫去恐妨鶯囀翠樓前其高致如此至今菴以

師名 白居易招韜光禪師詩白屋炊香飯葷羶不

紅薑帶紫芽命師相伴食齋罷一甌茶姚合謝韜

光上人贈百齡藤杖詩衰病近來行少力光公乞

我百齡藤聞來杖此向何處過水緣山只訪僧



惠皎

佛祖統紀長慶四年沙門惠皎於杭州西湖

孤山鐫石壁法華經刺史白居易九人助其功宰

相元微之爲之記

靈祐

瀉山語錄福州長谿趙氏子年十五出家依

本郡建善寺法常律師剃髮於杭州龍興寺究大

小宗乘教游江西參百丈丈一見許之入室後居

瀉山

國朝雍正十一年

勅封靈覺大圓禪師

寰中

五燈會元師河東蒲坂盧氏子於并州童子

寺出家受心印於百丈海結茅南嶽後住浙江大

慈山示衆云說得一丈不如行取一尺說得一尺

不如行取一寸唐武宗廢教師短褐隱居大中壬

申歲重剃染大揚宗旨西湖高僧事略師居大慈

學者甚衆山缺水擬移錫夜夢神人曰我移南嶽

小童子泉就師取用詰且見二虎以爪跑地泉自

湧出後有僧自南嶽至曰小童子泉涸矣咸通三

年無疾而逝僖宗諡曰法空大師塔曰定慧之塔



唐僖宗性空大師定慧塔讚履踐真實心悟無二南泉趙州激揚酬對居乏寒泉虎跑以濟維德斯彰風清日麗

楚南 釋氏稽古略 楚南福州張氏子得旨於黃蘗

初抵姑蘇報恩寺精修禪定尋住錢塘慈雲光啟  
間刺史錢鏐請師下山供養僖宗聞其道化就賜  
紫衣文德元年入寂塔於院之西隅著破邪論行  
世

文喜 西湖高僧事略 語溪人姓朱氏開成元年間  
進具初習四分律兼講法華嘗往五臺山禮文殊

大士夜投古寺遇老僧問南方佛法師答已問此  
間佛法如何僧曰凡聖同居又問多少眾僧曰前  
三三後三三師惘然茶畢令童子送出門俄失所  
在但高林深谷而已後參仰山契悟命為典座一  
日見文殊跨獅子緣甬側師訶曰文殊自文殊文  
喜自文喜遂掌之文殊躡空曰苦瓠連根苦甜瓜  
徹蒂甜修行三大劫卻被老僧嫌咸通中築室千  
頃山居之光啟三年錢武肅王請住餘杭慈光院  
賜紫衣及無著號光化三年移住無著院是冬夜



半告衆曰三界心盡卽是涅槃趺坐而化建塔靈  
隱之西陽聖果寺志七歲出家往五臺山咸通三  
年參仰山寂禪師令爲典座大順元年錢王奏賜  
紫衣請師住聖果乾寧四年又奏賜無著號光化  
己未又移居無著院十月廿七日夜子時告衆曰  
三界心盡卽是涅槃言訖跏趺而逝時方丈發白  
光林木同色世壽八十僧臘六十

五代

可周高僧傳可周俗姓傅晉陵人出家建元寺挈

囊至豫章遇雲表法師盛集窮法華日就月將幹  
運深趣梁乾化二年於杭州龍興寺召開演黑白  
衆恒有半千武肅王錢氏命於天寶堂夜爲冥司  
講經鬼神現形扈衛往往人覩焉王聞而鄭重賚  
金如意并鉢紫衣一副加號精志通明以天成元  
年終於觀音院本房

彌洪十國春秋彌洪夙有道行開運元年結菴於  
杭州煙霞洞口尋於洞內見石刻羅漢者六遂虔  
禮之已而彌洪死忠懿王一夕夢僧告云吾兄弟



一十八人今方有六王盍爲我聚焉王命侍臣訪至洞遂補刻一十二像

道愆

〔天龍寺志〕唐天龍道愆順德禪師永嘉陳氏子初住越州鏡清院學者奔奏吳越錢王命居天龍寺後創龍冊寺延請居焉晉天福初示寂塔於龍冊山

志逢

〔五燈會元〕志逢餘杭人出家於臨安之東山朗瞻院嘗夢陞須彌山觀三佛列坐初釋迦次彌勒皆禮其足惟不識第三尊釋迦謂之曰此是補

彌勒處師子月佛師方作禮覺後閱大藏經乃符所夢天福中抵天台雲居參韶國師賓主緣契頓發元祕一日入普賢殿宴坐有神人跪膝而前曰凡折鉢水亦施主物傾棄非所宜也言訖而隱自是洗鉢水盡飲之吳越王召賜紫署普覺禪師住功臣山〔西湖高僧事略〕忠懿王建普門精舍請揚宗要爲開山始祖後五臺山新剎華嚴道場施以終老卽理安也師出入嘗攜大扇號大扇和尚入市乞錢買肉飼虎虎每迎之載以還山又稱伏虎



禪師

道翊

〔西湖高僧事略〕道翊不知何許人石晉天福四年卓菴天竺山西北草衣木石高行絕塵一夕忽見前峰有光燭天跡視之得異木人莫能名師乃取之命匠孔仁謙刻爲觀音大士像已就夢白衣人曰明日有僧自洛陽來隨身有古佛舍利當求之已而僧果至如夢求之得舍利三納於大士頂門自是靈異大著宋治平二年郡守蔡襄表其事上之賜靈感觀音院額上天竺山志師當陽侯

杜公子出家於終南山翠峰寺

行修 一十國春秋修泉州陳氏子生而長耳垂肩七歲猶不言或曰瘖耶忽應聲曰不遇作家徒撞破煙樓耳長至金陵瓦棺寺祝髮受具參雪峰義存至四明山中松下說法天花紛雨又趺坐龍尾巖百鳥銜花飛繞來杭之法相院依石爲室禪定其中乏水卓錫巖際清泉迸出乾祐初忠懿王飯僧永明寺僧延壽告王曰長耳和尚定光佛應身也王趣駕參禮行修嘿然但云永明饒舌俄頃趺坐



而化久之脂膚津澤爪髮俱長寺僧恐其久而毀也乃髹塗其體崇寧三年賜號崇慧大師

慧明

〔崇聖紀事〕慧明姓蔣氏幼歲出家謁法眼師

資道合尋回鄞水大梅山菴居遷天台白沙漢乾祐中錢忠懿王延入府中問法命師住崇聖爲開山祖王因命翠巖令參等及城下名公定其勝負時羣彥弭伏王大悅署圓通普照禪師後移報恩契盈〔十國春秋〕契盈閩人通內外典學廣順中來居杭之龍華寺賜號廣辨周智禪師一日侍忠懿

王遊碧波亭時潮水初滿舟楫輻輳王喜曰吳越國去京師三千里誰知一水之利如此契盈答曰可謂三千里外一條水十二時中兩度潮時人稱爲駢切時江南未通兩浙貢賦率由海達青州故云

道潛

〔十國春秋〕道潛河中人本姓武氏顯德初忠

懿王迎入西府受菩薩戒賜號慈化定慧禪師居慧日永明院道潛嘗欲從忠懿王求羅漢銅容未白也王忽夢十八巨人隨行明日道潛以請王奇



而許之賜號應真西湖高僧事略道潛身長七尺  
許胸瘧七點若北斗狀初謁清涼法眼一見異之  
許入室問答言下開悟眼曰子向後有毳徒五百  
爲王侯所重尋辭往三衢古寺閱藏經忠懿王命  
入府周顯德元年建慧日永明院請師居之爲開  
山始祖衆常五百果符法眼之記

延壽 惠洪智覺禪師行業記師餘杭王氏子兒時  
知敬佛及冠日惟一食誦法華經五行俱下有羣  
羊跪聽年二十八爲華亭鎮將見漁船萬尾戢戢

皆易之放於江投翠巖岑公學出世法吳越文穆  
王聞而慕悅聽其薙髮嘗習定天台天柱峰下有  
尺鷃巢衣禰中初說法雪竇建隆元年移靈隱又  
移之永明衆至二千時號慈氏下生十國春秋延  
壽以心爲宗以悟爲旨著宗鏡錄一百卷又注心  
賦抱一子若干卷賜號智覺禪師西湖高僧事略  
師字冲元得法於天台韶國師初住雪竇尋歸西  
湖忠懿王請爲永明第二代居十五年移天台夜  
施食朝誦經日課一百八事未嘗暫廢自號抱一



子

國朝雍正十一年四月二十六日欽奉

上諭加封妙圓正修智覺禪師淨慈寺內舊供法相重

為莊嚴令僧徒瞻禮供養并著地方官修理塔院

查明支派

欽擇承嗣之人承嗣

宋

贊寧

堯山堂外紀贊寧德清人出家靈隱寺宋初

徵入汴京為僧錄太祖行香至相國寺問曰朕見

佛拜是不拜是對曰現在佛不拜過去佛太祖大

喜遂為定禮十國春秋贊寧本姓高氏為兩浙僧

統是時江湖或溢出石塘贊寧與延壽建塔於江

干鎮之湖由是復尋故道太平興國三年召對滋

福殿賜紫方袍尋賜號曰通慧命充翰林史館編

修纂高僧傳三十卷內典集一百五十卷外學集

四十九卷聽歸杭州舊寺卒諡圓明葬龍井湘山野錄

僧錄贊寧洞古博物著書數百卷王禹偁徐鉉就而質焉柳仲途開贈以詩有空門今日見張華之句王禹偁通慧大師文集序文穆王時大師聲望日隆又得文格於光文大師彙征受詩訣於前進



士龔霖由是大為流輩所推時錢塘名僧有若契  
疑者通名教一支謂之論虎常從義者文章俊健  
謂之文虎大師多毘  
尼著述謂之律虎

紹巖 高僧傳紹巖俗姓劉雍州人七歲求出家於

高安禪師十八進具於懷暉律師凡百經書覽同  
溫習泊入吳會棲息天台四明山與德韶禪師共  
決疑滯臨川益公遂請於錢塘湖水心寺挂錫恆  
諷持法華經無晝夜俄感陸地生蓮續居上方淨  
院有疾不求藥石作偈示門徒跏趺而化

晤恩 武林梵志晤恩字修已常熟人姓路年十三

聞誦彌陀經遂求出家乃投破山興福寺受訓後  
晉開運中造錢塘慈光寺志因師講貫彌年通達  
法華光明經止觀論雍熙三年八月朔日於中夜  
覩白光自井而出明滅不恆乃絕粒禁言一心念  
佛至二十五日為弟子說止觀指歸及觀心儀端  
坐面西而化

省常 佛祖統紀西湖昭慶寺沙門省常刺血書華  
嚴淨行品結社修西方淨業宰相王旦為之首參  
政蘇易簡等百三十二人一時士夫皆稱淨行社



人謂廬山蓮社莫如此日之盛

道誠 武林紀事 錢塘慧悟大師道誠居月輪山撰

釋氏要覽三卷又注王勃釋迦成道記丞相王隨

守杭贈以詩

余弼慧悟禪師上方詩孤峰牢落幾何年臺殿於今插半天已是精藍跨

絕徽更將寶塔在危顛煙霞色任陰晴變鐘磬聲隨上下傳珍重老僧無別境一生幽趣只山川

智圓 佛祖通載 智圓字無外自號潛夫生錢塘徐

氏八歲受具二十一歲聞奉先源清師傳天台三

觀之旨問辨凡二年而清歿遂居西湖孤山西湖

高僧事略師早勤儒學兼涉老莊自號中庸子居

孤山瑪瑙院時王文穆罷相知杭州諸僧出汙慈

雲遣使邀之偕往師以疾辭曰爲我致意慈雲錢

塘且留卻一僧聞者歎服獨居杜門與林逋爲鄰

友以詩文自娛雜著五十一卷題曰閒居編示寂

門人奉遺教卽後山斂以陶器而瘞之後十五年

積雨山頽啟陶視之真身不壞爪髮俱長其唇微

開齒若珂雪諡號法慧

契嵩 僧寶傳 嵩潭津李氏受記蒞於洞山聽公夜

則頂戴觀音像誦其號必滿十萬乃寢經書章句



不學而能著禪宗定祖圖傳法正宗記書成游京師韓琦歐陽修延見而尊禮之還居錢塘佛日禪院夢梁錄契嵩字仲靈自號潛子熙寧歲季夏入滅以釋氏法茶毗五根不壞者三名其塔曰五根不壞之塔宋濂傳法正宗記序宋明教大師契嵩傳採三藏洎諸家記載釋迦為表三十三祖為傳持法一千三百四人為分家略傳而旁出宗證繼焉名曰傳法正宗記復畫佛祖相承之像明其世系名曰定祖圖申述禪師及西域諸師為證以闡義學者之妄名曰正宗論共十二卷其衛道之嚴稟乎不可犯也

善昇 武林紀事善昇錢塘人姓仲十歲出家註御

製法音集賜號日觀大師深於琴操住天竺寺范仲淹屢入山訪之一日遣侍者告范而逝范公為作墓銘

慧勤惠思

咸淳臨安志慧勤餘杭人歐陽公贈以

詩同時有惠思亦居孤山

蘇軾錢塘勤上人詩集序故太子少師歐陽公

好士為天下第一不喜佛老其徒有治詩書學仁義之說者必引而進之佛者慧勤從公游三十餘年公常稱之為聰明才智有學問者尤長於詩熙寧七年余自錢塘將赴高密勤出其詩若干篇求余文以傳於世余以為詩非待文而傳者也若其為人之大略則非斯文莫之傳也歐陽修送僧慧勤詩越俗僭宮室傾貲事雕牆佛屋尤其侈耽耽擬侯王文彩瑩丹漆四壁金焜煌上垂百寶蓋宴



坐以方牀胡為棄不居樓身客京坊辛勤營一室  
有類燕巢梁南方精飲食箇笋鄙羔羊飯以玉粒  
粳調之甘露漿一饌費千金百品羅成行晨興未  
飯僧日昃不敢嘗乃茲隨北客枯粟充饑腸東南  
地秀絕山水澄清光餘杭幾萬家日夕焚清香煙  
霏四面起雲霧雜芬芳豈如車馬塵髣髴染成霜  
三者孰苦樂子奚勤四方乃云慕仁義可以治膏  
盲有志誠可嘉及時宜自強人情重懷土飛鳥思  
故鄉夜枕聞北雁歸心逐南橋歸兮能來否送子  
以短章季觀送僧慧勤歸鄉詩舊國起歸興三江  
一櫂輕夜吟逢月白曉渡趁潮平楚岸雲藏寺吳  
宮水遶城羨師塵外去何日濯吾纓王安石和惠  
思歲二日詩沙礫藏春未放來荒庭終日守陳荻  
遙隣草色裙腰綠湖寺西南一徑開蘇軾九日尋  
臻閣黎遂泛小舟至勤師院詩白髮長嫌歲月侵  
病眸兼怕酒盃深南屏老宿閒相訪東閣郎君懶  
重尋試碾露芽烹白雪休拈霜齒嚼黃  
金扁舟又載平湖去欲訪孤山支道林

淨源

西湖高僧事略師字伯長姓楊氏生而敏慧

依東京報慈寺渡達大師得度奮志參尋初見華  
嚴承遷次見橫海明覃後見長水子璿盡得華嚴  
奧旨住泉之清涼蘇之觀音杭之祥符湖之寶閣  
秀之善住左丞蒲公守杭以慧因院易禪為教命  
師居之所至緇素景慕師筆力秀勁合華嚴證聖  
正元二疏為一以便觀覽製華嚴楞嚴圓覺三懺  
法及法華集義通要十四卷又疏解仁王般若等  
經元祐三年冬示寂茶毘得舍利無數瘞於慧因



院之西北壽七十八先世泉之晉水人故學者以

晉水稱之蘇軾訪晉水淨源法師不遇詩清曉來香利源公尚未歸不聞鐘磬響惟見白雲飛又題晉水法師影堂詩吾師乘鶴去惟有鶴林存何時飛錫來相談朝與昏

重顯 僧寶傳顯字隱之遂州李氏幼依普安院仁

銑落髮北游至復州北塔祚禪師愛之留止五年

盡得其道與學士曾公會善相值淮上問顯何之

曰將游錢塘曾曰靈隱天下勝處珊禪師吾故人

以書薦顯顯至靈隱三年曾奉使浙西訪顯於靈

隱問向所附書顯袖納之曾大笑珊益以是奇之

慧辯

西湖高僧事略師字訥翁華亭富氏子受業

普照從天台韶及浮石矩傳天台教觀韶將老命

師代講夢章安以金篦擊其口曰汝勤於誨人當

得辨智久之卒繼其席嘉祐中翰林沈公邁帥郡

以嚴為理察師道行獨異之俾涖僧職遷都僧正

東坡時為通守嘗與師為方外游講授二十五年

往來常千人無何歸隱草堂但六事隨身而已熙

寧六年冬旦起盥濯別眾而化遺戒須待東坡至

方合龕越四日坡始抵山中趺坐如生頂尚溫暖



作三詩輓之師滅二十一年坡追序其事云余去杭夢至西湖上有大殿榜曰彌勒下生故人海月辨師之流皆行道其間乃作贊詞穎濱銘其塔

慧才 釋氏稽古略杭州南山法師慧才解行入四明法智尊者之室每持大悲咒必百八遍嘗夢觀世音菩薩脫袈裟以衣之是春三月為靈芝元照及道俗千人受菩薩大戒於雪峰方羯磨觀音像放光明初貫寶焰漸散講堂燈炬日光皆為映奪淨慈禪師守一作證戒光記米芾書

清順可久 夢梁錄清順字怡然可久字逸老所居

皆湖山勝景而清約介靜不妄與人交無故不入城市有饋之米者日取二三合食之雖蔬茹亦未

嘗有人尤重之 明聖湖觀子瞻佐郡日與僧清順可久惟肅義詮為方外之交

道潛 咸淳臨安志字參寥於潛浮溪邨人本姓何以童子誦法華經度為比丘於內外典無不窺能文章尤喜為詩嘗賦臨平絕句蘇軾為寫而刻諸石軾守錢塘卜智果精舍居之軾南遷道潛轉海訪之當路拮其詩語謂有譏刺遂返初服建中靖



國初曾肇言其非辜詔復祝髮賜號妙總大師崇

寧末歸老西湖有詩集行世墨莊漫錄本名曇潛

子瞻改曰道潛

陳師道送參寥序妙總師參寥大

覺老之嗣眉山公之客而少遊氏

之友也釋門之表士林之秀而詩苑之英也余愛

其詩讀不捨手屬其談晚不聽去夜相語及唐詩

僧參寥子曰貫休齊己世薄其語然以曠蕩逸羣

之氣高世之志天下之譽王侯將相之奉而為石

霜老師之役終其身不去此豈用意於詩者工拙

不足病也由是而知余之所貴乃其棄餘所為淺

之為丈夫者乎於其行敘以謝之蘇軾送參寥師

詩上人學苦空百念已灰冷劍頭惟一映焦穀無

新穎胡為逐吾輩文字爭蔚炳新詩如玉雪出語

便清警退之論草書萬事未嘗屏憂愁不平氣一

寓筆所騁頗恠浮屠人視身如邱井頽然寄淡泊

誰與發豪猛細思乃不然真巧非幻影欲令詩語

妙無厭空且靜靜故了羣動空故納萬境閱世走

人間觀身卧雲嶺鹹酸雜衆好中有至味永詩法

不相妨此語更當請秦觀春日寓直有懷參寥詩

觚稜金爵自昭曉藏室春深更寂寥捫虱幽花欹

露葉岸巾高柳轉風條文書几上鬚髯變鞍馬塵

中歲月錯何日一筇江海與君徐步看生潮

仲殊 堯山堂外紀仲殊名揮姓張氏安州進士棄

家為僧居杭州吳山寶月寺能詩與東坡為方外

交明聖湖觀仲殊嗜蜜思聰嗜琴東坡詩祇有琴

聰與蜜殊是也

蘇軾次韻仲殊雪中遊西湖詩寶

雲樓閣闌干門林靜初無一鳥喧

閉戶莫教風掃地卷簾疑有月臨軒水光激盪猶

浮碧山色空濛已斂昏乞得湯休寄絕句始知鹽

絮是

陳言



思聰

東坡志林孤山思聰聞復師作詩清遠如畫

工而雅逸放而不流其為人稱其詩

蘇軾送錢塘僧思聰歸孤

山敘錢塘僧思聰七歲善彈琴十二捨琴而學書十五捨書而學詩詩有奇語雲煙蔥朧珠璣的鑠識者以為畫詩之流聰又不已遂讀華嚴諸經入法界海慧今年二十有九老師宿儒皆敬愛之秦少游取楞嚴文殊語字之曰聞復使聰日進不止自聞思修以至於道則華嚴法界海慧盡為蘊廬而況書詩與琴乎吾將觀焉以為聰得道淺深之候韓駒次韻思聰詩欲問琴聰冰鏡篇揭來端為著幽禪五更下馬呼殘夢數面成親是宿緣伏腦憐君有犀骨騰身笑我不鳶肩白頭奔走襄陽道空誦新詩憶浩然

元淨

咸淳臨安志本姓徐字無象於潛人十歲出

家受業於慈雲慈雲沒復事明智年二十五賜紫

衣及辨才號知杭州呂溱請住大悲寶閣居十年

沈文通邁治杭命住上天竺師增室至萬礎重樓

傑閣冠於浙西學者數倍居十七年有奪之者遂

還於潛逾年復歸天竺趙抃贊之曰師去天竺山

空鬼笑天竺師歸道場光輝留三年謝去老於南

山龍井之上精修行業行成力具著應非一嘗與

僧熙仲同食仲視師眉間有光如螢攬之得舍利

元祐八年示寂壽八十一

蘇軾辨才大師真贊即之浮雲無窮去之明月



皆同欲知明月所在在汝唾霧之中又贈上天竺  
辨才師詩南北一山門上下兩天竺中有老法師  
瘦長如鶴鵠不知修何行碧眼照山谷見之自清  
涼洗盡煩惱毒坐令一都會男女禮白足我有長  
頭兒角頰時犀玉四歲不知行抱負煩背腹師來  
為摩頂起走趁奔鹿乃知戒律中妙用謝羈束何  
必言法華伴  
狂噉魚肉

了元 僧寶傳字覺老號佛印饒州浮梁林氏從師

授五經去讀首楞嚴經於竹林寺愛之盡捐舊學  
游廬山謁開先暹道者暹大稱賞於是說法為開  
先之嗣四住雲居四十年之間德化緇白縉紳之  
賢者多與之遊曹王以其名奏之賜號佛印西溪

梵隱志清化寺改名龍歸佛印禪師曾卓錫焉西

湖志餘杭之臘燭菴聖水寺皆其道場也 蘇軾戲答佛印

偈百千燈作一燈光盡是恆沙妙法王是故東坡  
不敢惜借君四大作禪牀秦觀送佛印詩抱包初  
捨蔚頭藍江月松風處處參化日惠林為上首幾  
年彌勒作同龕真珠撒帳開新座飛鳥啣花繞舊  
菴雲散虎溪蓮社友  
獨依香火思何堪

宗本善本 咸淳臨安志宗本字無詰姓管號淨慈

圓照禪師熙寧中郡守陳襄請住淨慈山越數年  
神宗召入福寧殿說法詔賜肩輿入見善本開封  
人圓照禪師住淨慈招師居上座圓照退師繼之



韓絳奏號法涌大師哲宗遣中使撫問降香宣賜

高麗磨衲衣敕賜大通禪師大觀入滅追諡圓定

之號塔號定光之塔泊宅編大通乃圓照弟子時

稱吳中二本

西湖遊覽志餘大通禪師操律高潔人非齋沐不敢登堂東坡一日挾妙

妓謂之大通慍形於色公乃作南歌子一首令妙

妓歌之大通亦為解頤公曰今日參破老禪矣蘇

軾淨慈寺謁圓照本禪師詩卧聞禪老入南山淨

掃清風五百問我與世疎宜獨往君緣詩好不容

攀自知樂事年年減難得高人日日閒

欲問雲公覓心地要知何處是無還

遵式 夢梁錄遵式姓葉字知白崇寧間賜慧通大

師掌天台教觀紹興間住天竺高宗賜號曰慈雲

懺主西湖高僧事略師台州寧海人母夢嚙明珠

而生出家於東掖山傳天台教於寶雲通未幾繼

其席祥符八年刺史薛公請居靈山天竺寺王文

穆出守重師之道奏復天竺名尋賜慈雲號依經

撰集諸懺法盛行於世常行三昧以九十日為期

感應非一凡為法祈禱必燃指惟存三焉天聖九

年歸東嶺草堂明年示寂累諡法寶禪慧淳祐八

應加諡正覺

林逋送遵式師謁王相國詩虎牙熊

軾隱鈴齋棠樹陰陰長碧苔丞相望



崇賓謁少清談應喜道人來天竺屨顏暫掩扉講  
香浮穗上行衣白猿聲裏生公石莫遣移文怨晚  
歸又和天竺慈雲師詩林表飛來色猶憐久卜隣  
松迥一水路夢想五天人謝絕空園草沉冥滿几  
塵暮雲如有得  
靈謝寄聲頌

嗣珍

高僧傳嗣珍法師住上天竺提唱宗風

上天竺山

志宣梵嗣珍法師政和五年居觀堂時微猷閣待  
制李偃知杭州入山訪之適師下山而遇諸途卽  
植杖立談忘日之既夕也因建植杖亭以志其處  
師喜著屐嘗構精舍於西峰石磴紆盤出入每三  
休焉謂人曰昔謝安石隱東山嘗攜二妓游薔薇  
洞吾以松竹爲薔薇歲寒青青卒無開落以白雲  
明月爲二妓空色兩忘吾何忝安石  
哉爰構亭逕之半曰謝屐以志所好

雲閣黎

西湖遊覽志雲居寶山蘇子瞻佐郡遊山

偶入方丈小院閬然有僧隱几低頭讀書與之語

漠然不對問其隣僧曰此雲閣黎也不出十五年

矣不數月卒子瞻再往訪之以詩題壁

蘇軾題寶山院壁詩

雲師來寶山一住十五秋讀書常閉戶客至不舉  
頭去年造其室清坐忘百憂我初無言說師亦無  
對酬今年復叩門空房但颺颺云已滅無餘薪盡  
火不留卻疑此室中常有斯人不所遇孰非夢事  
過吾何求

思淨

西湖高僧事略師錢塘喻氏子好畫阿彌陀

佛臻其妙世呼喻彌陀棄家學佛就北關儼舍飯  
僧不二十年及三百萬賜妙行額廣所居爲寺接



待不絕屬離亂師造賊壘願以一身代一城之命  
賊聞之悚然爲之少戢或問師畫彌陀何不參禪  
荅曰平生只解念彌陀不解參禪可奈何但得五  
湖風月在太平何用起干戈兒時遊西湖多寶山  
輒作念曰異時當鑄此石爲佛後果爲彌勒像侍  
郎薛公問曰彌勒現住天宮說法鑿石奚爲荅曰  
咄哉頑石頭全憑巧匠修只今彌勒佛莫待下生  
求平生務實際不事虛飾紹興七年跌坐而化侍  
郎張九成銘其塔

惟政 西湖高僧事略字渙然華亭黃氏居功臣山  
出入常跨一黃牛或問師何不談禪曰徒費言語  
性簡率冬不附爐惟以荻花作毬納足其中客至  
其之特好玩月盤膝坐大盆浮池中自旋轉之吟  
嘯達旦率以爲常世稱爲政黃牛

法照 武林紀事照住水心寺不妄接人惟與高僧  
智圓爲友撰律鈔義苑七卷歿後王隨爲撰塔銘  
立石兜率寺崇寧中賜號法照大師

守璋 夢梁錄守璋姓王戒行精潔尤工於詩號文



慧禪師有柿園集行於世咸淳臨安志高宗於紹

興二年幸圓覺寺因覩其集宸翰親灑晚春一絕

刻石於亭曰山突煙景重林茂夕陽微不雨花猶

落無風絮自飛復書圓覺經及製二詩賜之宋高宗

覺寺詩古寺春山青更妍長松修竹翠含煙汲泉

擬欲增茶興暫就僧房借榻眠久坐方知春晝長

靜中心地自清涼人人圓覺何曾覺但見塵勞盡日狂

淨輝 賈耳集孝宗幸天竺及靈隱有輝僧相隨見

飛來峰問輝曰既是飛來如何不飛去對曰一動

不如一靜又有觀音像手持數珠問曰何用曰要

念觀音菩薩問自念則甚曰求人不如求己

慧遠 佛祖統紀慧遠號瞎堂乾道七年二月入對

選德殿上有省首肯之八年十月賜號靈隱慧遠

佛海禪師靈隱寺志姓彭眉山金流鎮人二手如

日月普燈錄年十三從藥師院宗辨為僧會圓悟

復領昭覺遠依之稟法嗣

崇岳 陸游松源禪師塔銘崇岳生於龍泉之松源

吳氏因以自號見大慧杲於徑山大慧稱蔣山應

菴華公為人徑捷師聞之不待旦而行既至朝夕



咨請應菴大喜以為法器隆興二年得度於臨安

西湖白蓮精舍自是遍歷江浙諸老之門罕當其

意慶元丁巳適靈隱虛席被旨居六年道盛行法

席為一時冠退居東菴微疾書偈而寂塔於北高

峰之原

陸游呈松源禪師詩幾度驅車入帝京逢僧一例眼雙青今朝始覺禪家別說有談

空要眼聽

道濟 七修類藁濟顛聖僧宋時累顯聖於吾杭湖

山間有小石像在淨慈羅漢堂淨慈寺志濟字湖

隱天台李茂春子母王氏夢吞日光而生年十八

就靈隱瞎堂遠落髮風狂嗜酒肉寺眾訐之瞎云

佛門廣大豈不容一顛僧自是人稱濟顛遠寂往

依淨慈德輝為記室嘗欲重新藏殿夢感皇太后

臨賜帑金嘉泰四年夕醉繞廊喊無明發眾莫悟

俄火發燬寺濟乃自為募疏行化嚴陵以袈裟籠

罩諸山山木自拔浮江而出報寺眾云木在香積

井中六丈夫勾之而出監寺欲酬之錢辭曰我六

甲神豈受汝酬乎遂御風去瀕湖居民食螺已斷

尾矣濟乞放水中活而無尾嘉定二年五月十六



日索筆書偈曰六十年來狼籍東壁打倒西壁如  
今收拾歸來依舊水連天碧擲筆而逝葬虎跑塔

中蓋五百應真之流云

釋戒顯濟顛祖師詩惟爾  
真羅漢縱橫魔佛間師尊

一瞎老顛盡兩名山詩偈天然韻神  
通半雜頑金身披破衲頂禮欲開顏

智融

樓鑰方外傳俗姓邢以醫入仕南渡後居臨

安萬松嶺號草菴邢郎中官至成和郎年五十棄  
官謝妻子祝髮靈隱寺人不知其能畫山深多蛇  
忽作二奇鬼於壁一吹火向空一蹋蛇而掣其尾  
蛇患遂除

道冲

隨隱漫錄閻妃以特旨奪靈隱寺菜園建功

德寺住持冲號癡絕退院示衆云欲去不去被去  
礙欲住不住被住礙渾不礙十洲三島鶴乾坤四  
海五湖龍世界釋氏稽古略冲武信長江苟氏遍  
歷叢林皆分半座淳祐四年奉旨住靈隱

居簡

靈隱寺志敬叟居簡禪師潼川龍氏真西山

爲江東部使者虛東林命之以疾辭於飛來峰北  
洞掃一室居之十年人以北澗稱之淳祐丙午示  
寂有北澗集十九卷



元敬 莫子文西湖高僧事略序瑪瑙講師元敬字

節菴會萃名宿嘗駐錫錢塘者得二十有四人撫

其事實而繫之贊續又得六人述而贊之圖其形

置之閣合而成書名西湖高僧事略燈燈相傳續

佛慧命將使後人而復高後人也

若芬 畫禪字仲石婺州人爲上竺寺書記模寫雲

山以寓意求者漸衆因謂世間人不辨真假如錢

塘八月潮西湖雪後諸峰二三子當面蹉過卻求

玩道人數點殘墨何耶歸老家山占勝作亭扁曰

玉澗因以爲號又建閣對芙蓉峰自號芙蓉峰主

元

溫日觀 輟耕錄日觀字仲言又號知歸子居葛嶺

瑪瑙寺能書善畫所畫蒲萄鬚梗枝葉皆草書法

也性嗜酒楊總統飲以酒則不一沾唇見輒罵曰

掘墳賊每至鮮于伯機家抱軒前支離叟或歌或

笑人莫測其意

吳萊題溫日觀畫蒲萄詩佛者本  
西域蒲萄亦來西柰何此善畫無  
復渠所攜我曾考其故初與漢使偕上林乃有館  
蔥嶺何所梯天時自不同地氣忽以迷結子且磊  
磊懸藤更高低先幾日已露薄德不及稽終令白  
巖像遠從雙狻猊從茲故國木伴爾禪家棲幽心



恍有得爛墨研為泥快哉一揮灑遽若無町畦依  
 稀可少辨變作天投蜺萬古空朔色南山竟朝躋  
 畫工尚逸品游戲從筌蹄豈伊吾無人何往非毫  
 倪豈伊吾無物桃李總成蹊此皆外所產故與中  
 州齊為爾撫此卷長歌欲驚嘶宋无僧日觀畫葡  
 萄詩玉山道人蒼壁立留瀦萬斛松煤汁吐作干  
 年古恠藤猶帶西湖煙雨濕元氣淋漓草木活太  
 陰菌蠢蟲蛇蟄須縈翠霧瘦蛟走晴抉元珠黑龍  
 泣神剝鬼刻字崛奇水精火齊光陸離天魔擎來  
 帝青寶鯨波湧出珊瑚枝墨花酣春馬乳見月落  
 庭空無影時

水盛 稽古續集 字竺源自號無住翁樂平人姓范

依羅山常公受度謁月庭忠公見孤舟濟師自信  
 法決可證因發誓云此身不能作佛當入無間獄

由是力參發悟濟公記之天曆間聘主西湖妙果  
 寺一時公卿與為方外交壽七十三

明本 稽古續集 號中峰錢塘孫族童時嬉戲必為

佛事稍長聞經教燃指臂求佛晝夜彌勵困則以  
 首觸柱期於必得乃已誦金剛經至荷擔如來處  
 恍然開悟後觀西湖流水乃大發明白是說法無  
 礙續文獻通考元仁宗賜號廣慧禪師及歿賜諡  
 智覺

原妙 淨慈寺志 高峰原妙吳江人出家淨慈時雪



巖欽寓南屏北澗塔所懷香往叩之後辭入天目立死關於師子巖三十餘載所著有高峰語錄

大訢 堯山堂外紀訢住杭州中天竺有學行研窮

教典旁貫百家文宗召赴闕特賜三品文階七修

類藁訢舊著黑衣文宗賜以黃衣其徒後皆衣黃

歐陽原功題僧墨菊詩苾芻原是黑衣郎當代深仁始賜黃今日黃衣翻潑墨本來面目見馨香

行端 續傳燈錄號元叟臨海何氏初參藏叟於徑

山尋以靈隱山水清勝挂錫焉大德中主中天竺

皇慶壬子遷靈隱二被金襴袈裟之賜慕其道者

鱗萃至無所容靈隱寺志端文字不由師授自然

能通自稱寒拾里人以至正辛巳化去窆於寂照

院

明

懷涓

獻徵錄字清遠晚自號竹菴南昌魏氏子生

而英發不待師授而知解日勝時全悟以大中大

夫住持集慶大龍翔寺見之喜曰此吾宗千里駒

也函挽至座下詰難再三悟笑曰汝可入吾室矣

浙江行省丞相康里公延主會稽之寶相未幾遷



杭之報國洪武初淨慈禪林虛席復請為住持一

日召弟子善解屬以後事怡然而逝

張羽寄南屏渭長老詩蒲

室傳心第一宗老尋古刹寄行踪貫花偈就人爭寫壞色衣穿自懶縫案上梵經皆貝葉手中談塵是青松何年惠遠重開社來聽東林寺裏鐘

德祥 兩湖塵談號芷菴杭人洪武中高僧能詩善

書淨慈寺志俗姓鍾氏洪武初住持淨慈所著有

桐嶼集

姚廣孝祥長老草書歌祥師只今為巨擘上與閑素爭噴岫錢塘山水甲天下秀氣

毓子為靈檀十年不出筆成冢中山老兔愁難安晴川小試烏玉玦雙龍隨手掀波瀾昨將一紙遠寄我天孫機錦干花攢願師勿置鐵門限從他需索來熱官縉紳相與歎莫及便欲奪去加巾冠

來復 名山藏字見心豐城人主靈隱寺禪源妙悟

教部精探其詩清明橫逸有塵外思西湖遊覽志

洪武初以高僧徵仕至左覺義著有蒲菴集

宋濂復公

文集序昔官禁林四方以文來見者甚眾晚閱見心復公之作儂麗而演迥整暇而森嚴劍出匣而珠走盤也發為聲歌其清朗橫逸絕無流俗塵土之思真諸古人篇章中幾不可辨因謂當今方袍縫掖之流鮮有過之者焉其可傳遠無疑虞集送復見心返杭兼柬張伯雨詩春雨西江漲百川袈裟又上浙東船行尋龍卧雲生靜坐聽猿吟月浸泉客裏有詩煩為寄山中何法可相傳故人或者尋張拙鼻涕垂頤雪滿肩張翥贈來復詩蓮花峰下天香樹吹老西風幾度秋僧寶師真洪覺範詩成我亦孟參謀文章宇宙千年事身世江湖萬里舟甚欲相期石橋路更須同訪羽人邱周伯琦答



見心長老見寄詩浙水東頭佛舍蓮蒲菴上土坐忘年五雲古衲層瀾湧百寶浮圖列宿躔牀上貝書多譯梵門前海舶直通燕比邱喜得階蘭秀應種菩提滿法田

慧日 上天竺山志 號東溟天台人明洪武初召見

說毘尼淨戒辭歸天竺夢蓮花生而寂壽八十九

守仁 靈隱寺志 號一初富春人靈隱僧從楊廉夫

張伯雨遊能詩善書法洪武中徵授僧錄司右善

世所著有夢觀集 楊維禎送蘭仁二上人歸三竺序余在富春時得山中兩僧口

蘭曰仁皆用世之才授之以春秋經史學兵興潛於釋

宗泐 名山藏 泐臨海人始生坐即跏趺人異之八

歲從全悟學經藏過目成誦自是深入秘密兼通

古文詞與僧來復齊稱淨慈寺志季潭泐別號全

室得旨淨慈笑隱訢嘗居南屏松月居洪武初應

召居龍翔集慶演經注經製讚佛樂章賜膳無虛

日每和其詩稱為泐翁又命往西域得文殊等經

而還 張雨寄中竺泐季潭詩師從鍾山來遺我故人書一入白雲去相思秋雨餘徒慙塵土迹

未擬竹林居遙想中峰月清空滿室虛高啟和復

見心簡季潭泐公詩高堂鐘鼓毒龍驚曾布袈裟

海上城廬岳禪師傳法印道園學士許詩名幾趨北闕瞻天近獨坐南屏對月明書到喜聞雙徑老雨花新散滿瑤京



一如 錢塘縣志 會稽人 洪武二十八年居上天竺  
 善講法華經少師姚廣孝嘗語人曰如公兩浙一  
 人也永樂間修大藏經詔一如總其事

如蘭 上天竺山志 古春名如蘭富春人淹通經論

餘及詩文所著名支離叟集于忠肅公彌月時師

赴湯餅會摩其頂曰此兒他日救時宰相也後果

驗于謙弔古春蘭法師詩維那正法眼冰鑑獨先

知摩頂昔憐我銘心更憶詩救時慚宰相被謗

慧炬 靈隱寺志 照菴慧炬律師明天台教諸暨人

住理公巖周伯琦為篆記與黃潛友善洪武初海

潮衝岸壞民居廬舍師為潮神說三皈戒楊枝灑

處即止不崩時稱炬菩薩

簡菴 萬曆錢塘縣志 得法時菴後徵修大典校讎

法藏賜賚甚厚歸蒞南屏鼎新像設

祿宏 西湖夢尋 字佛慧仁和沈氏子為博士弟子

試必高等一日閱慧燈集失手碎茶甌有省乃於

世相作一筆勾歌棄而事佛學使屠公力挽之不

回也從蜀師剃度受具遊方歸得五雲山古雲棲



寺舊址結茅默坐懸鐘煮糜日僅一食胸挂鐵牌  
 題曰鐵若開花方與人說久之檀越爭為構室漸  
 成叢林弟子日進一時江左諸儒皆來就正孝定  
 太后繪像宮中禮焉賜蟒袈裟不敢服破衲敝幃  
 終身無改齋惟菘蔬有至寺者高官輿從一槩平  
 等几無加豆晚著禪關策進其所述有云峭似高  
 峰冷似冰者庶幾似之列朝詩集傳環山多虎患  
 師諷經施食虎遂遠徙歲大旱擊木魚循田念佛  
 雨隨足迹而注首倡毗尼以立基本單提念佛以

攝禪淨住山三十餘年別眾示寂塋於五雲山麓

舊浙江通志師初出家語繼室湯曰生死事大  
 汝其勉之湯省悟亦出家孝義菴法名秣錦

國朝雍正十二年

勅封淨妙真修禪師著地方官致祭一次

大善 虛閒集傳大善字心宗別號虛閒子錢塘魏

氏投雲棲寺落髮既領善土不二之旨復遊普寧  
 雪浪之門參紫柏謁五乳坐禪荆溪閱藏琴川說  
 法於吳門修懺於天台幾及十年北遊至維揚遇  
 疾而返曰既割父母之愛又何必去父母之邦遂



歸隱西湖初住北峰之下次遷南峰之巔依泉就石襟江帶湖編蓬為室支木為牀唯齋頭帆影階下潮聲日供耳目最後遷西溪之上背山面水以古松為鄰語弟子知行曰當以方寸未安為念弗隨常流徒誇耳目之學也曹勳西溪百詠序西溪之名古不甚著著於南渡之留下其為西溪百咏者云是宋之遺民虛閒禪師彙而存之蓋既不忍前乎我者日銷日沉又不忍後乎我者若存若亡則高韻千古矣

國朝

方宜 杭州府志字夢曙茗人出家法相寺左筆善

書有詩名年十九有悟盡棄章句續雲棲放生之會不替者三十年康熙元年仲冬二十五日徧禮佛像集徒講演金剛經一卷次日至大江之濱卓杖大聲曰好江水遂立化

德修 錢塘縣志錢塘人寓方家峪茶亭薙髮後習靜北山窮谷中面壁二十年康熙七年元宵日自炊水沐浴說偈曰無拘無束不與形役逍遙自在正月十六入龕趺坐火自內出頃刻而化

弘禮 杭州府志號具德山陰張氏子投普陀寶華



菴仲雅師祝髮坐靈隱大殿火重新之構殿材於  
大山深谷鉅數十圍人力罕致一日雷雨大作暴  
水泛漲浮湧畢出殿成鉅麗甲天下

成法

徐自洙伯亭大師塔銘初名續法伯亭其字

仁和沈氏子早失怙恃九歲禮慈雲祖源為師十  
六薙染十七圓戒二十參乳源德水法師聽講楞  
嚴宿慧駿發洞徹微旨嘗論天台賢首之異同乳  
峰曉以雲棲之說言下大悟遂受囑精研四分律  
開講於慈雲兩修大殿重建聖果仁壽諸梵宇康

熙二十八年主上天竺

聖祖仁皇帝南巡幸寺

賜賚優渥重修毘盧殿閱十載退歸仁壽歲辛丑上竺災  
當事縉紳延師重主興建經營布置規模略成雍  
正六年四月朔日說偈辭眾合掌跌坐西向而逝  
世壽八十八僧臘七十九

上緒

沈嘉轍益後集序緒字亦諳錢塘詩僧始卓

錫西湖葛嶺移居南屏即孫高士太初舊隱也後  
示寂於臨平之小林所著集名益後凡九卷



示郊外... 西湖志

... 西湖志

... 西湖志

... 西湖志

... 西湖志

... 西湖志

... 西湖志

... 西湖志

西湖志卷之二十三  
總校王詒壽分校  
王彥起  
孫瑛校



